

妙法蓮華經台宗會卷五之一

十二

十二

C40  
4514  
(10)

E40-4514

了翁上座請大藏及有  
家書置之武州紫雲山  
我微矣隨院在清中永  
為學者不敢許出院內  
當山三世鐵子機謹誌



B 64853

妙法蓮華經台宗會義卷五之一

安樂行品第十四

古吳後學滿益智旭述

釋此為三。一依事釋。二附文釋。三法門釋。各有略

廣。略明依事釋者。身無危險故安。心無憂惱故樂。身安心樂。故能進于弘經口業之行也。略明附文釋者。先附上品文。著如來衣。則法身安。入如來室。故解脫心樂。坐如來座。故般若導行進。又附此品文。在忍辱地。故身安。而不卒暴。故心樂。觀諸法實

法華會集一  
相故行進也。略明法門釋者。安名不動。樂名無受。行名無行。不動者。六道生死。二乘涅槃所不能動。既不緣二邊。則法身無動搖。安住不動。如須彌山。名爲常任不動法門。上文云。身體及手足寂然安不動。其心常憺怕。未曾有散亂。卽此義也。無受者。不受凡夫之五受。乃至圓教中五受。生見亦皆不受。先約外道四句。及以絕言。名爲五受。次約藏通別各各四門。及一絕言。亦各五受。後約圓教四門。及一絕言。若未證實而生著見。亦名五受。體教入理。理無所受。方名不受。有受則有苦。無受則無苦。無苦無樂。乃名大樂。無行者。若有

所受卽有所行。無受則無所行。不行凡夫行。不行賢聖行。故言無行。而行中道是故名行也。次更廣事釋。夫安樂者。卽大涅槃。從果立名也。行者。卽涅槃道。從因得名也。若常見外道行于苦行。則因果俱苦。若斷見外道恣情取樂。則因樂果苦。若析法二乘。無常拙度。加功苦至。方入涅槃。則因苦果樂。今是如實巧度。故因果俱樂。大經云。定苦行者。謂諸凡夫。苦樂行者。聲聞緣覺。定樂行者。謂諸菩薩。今于菩薩中。應更分別。三藏菩薩。有教無人。通教

三乘因果俱偏。別教菩薩因偏果圓。圓教菩薩因果俱圓。今以俱樂俱圓之妙果妙因。稱爲安樂行也。次更廣附文釋。安樂行是涅槃道。涅槃有三義。謂三德秘藏。行有三義。謂止行。觀行。慈悲行。止行者。三業柔和。違從俱寂。卽是體法身行。上文所謂如來衣也。觀行者。一實相慧。無分別光。卽是體般若行。上文所謂如來座也。慈悲行者。四弘誓願。廣度一切。卽是體解脫行。上文所謂如來室也。總此三行爲涅槃道。總於三德爲行之境。境稱安樂道。

五 稱爲行。大論云。菩薩從初發心。常觀涅槃行道。因時用此三法導。三業爲行。三業淨故。卽是淨於六根。六根若淨。發相似解。而得入真。果時名爲佛眼耳等。因名止行。果名斷德。因名觀行。果名智德。因名慈悲行。果名恩德。又因名三業。果名三密。因時慈悲導。三業利他。果時名三輪。不思議化。如此觀時。無復分別。一切諸法中。悉有安樂性。一切衆生。卽大涅槃。不可復滅。行於非道。通達佛道。故名爲安樂行也。此行與涅槃義合。彼經云。復有一行是

法華會義 一  
如來行。如來是人安樂是法。如來是安樂人。安樂是如來法。總而言之。其義不異。別亦不異。彼經明金銀寶樹。譬無漏寶林。與此經寂滅忍衣合。彼經明明金沙大河。直入西海。譬一實慧。與此經法空座合。彼經明得道女人。則無諂曲。譬無緣大慈。與此經慈悲室合。彼經呼爲無餘義。此經呼爲無上道。又彼經所明聖行。卽如來座。天行。卽如來衣。梵行。嬰兒行。病行。卽如來室也。問。大經明親附國王。持弓帶箭。摧伏惡人。此經遠離豪勢。謙下慈善。剛柔

碩乖。云何不異。答。大經偏論折伏。而任一子地。何曾無攝受。此經偏明攝受。而頭破七分。何嘗無折伏。各舉一端。理必具四。適時稱宜。卽世界意。攝受卽爲人意。折伏卽對治意。悟道卽第一義意也。次更廣法門釋。所謂不動門。不受門。不行門。具如玄文十種三法。準例可知。若以此義爲四悉者。三法異卽世界。解脫卽爲人。般若卽對治。法身第一義也。問。此安樂行有何次第。答。法華圓行。一行無量。行不可思議。何定前後。今一往隨文說者。法師品

法華會義 一  
四  
略示弘經。則以益他爲本。故先明入室。此品辨惡  
一 世弘經安。諸逼惱。故先明著衣。前後互現耳。若約  
一 行說者。諸法從本來。常自寂滅相。乖寂起相。則應  
先以般若蕩累。是坐如來座。諸法不生。而般若生  
同體慈悲。愍衆故。行道次入如來室。旣以慈悲化  
世。必涉違從。決須安忍。次著如來衣。然說雖次第  
行非次第。行時入空。卽具一切法。况慈忍耶。四安  
樂行者。一是止觀慈悲導身業。二是止觀慈悲導  
口業。三是止觀慈悲導意業。四是止觀慈悲導誓

願也。身業有止故。離身粗業。有觀故。不得身不得  
身業。不得能離。無所得故。不墮凡夫地。有慈悲故。  
勤修身業。廣利一切。不墮二乘地。有止行。故著如  
來衣。有觀行。故坐如來座。有慈悲故。入如來室。止  
行離過。卽成斷德。觀行無著。卽成智德。慈悲利他。  
卽成恩德。恩德資成智德。智德能通達斷德。是名  
身業安樂行。餘口意誓願亦如是。此品來意者。若  
諸大菩薩。受命弘經。深識權實。廣知漸頓。又達機  
緣。神力自在。非復濁世惱亂所能障阻。不俟更示

法華會義 一  
五  
方法。若初依始心欲修圓行。入濁弘經爲濁所惱。

自行不立亦無化功爲是人故。須示安樂行也。

①此是迹門流通第五品經。文分爲二。初問。二答。

②初中二。初歎前品深行菩薩能如法弘經。二

問始行菩薩云何惡世弘經。③今初

爾時文殊師利法王子菩薩摩訶薩白佛言。世尊。是諸菩薩甚爲希有。敬順佛故。發大誓願。於後惡世。護持讀說是法華經。

④二問始行菩薩云何惡世弘經

世尊。菩薩摩訶薩於後惡世。云何能說是經。

⑤二答爲三。初總標章。二解釋修行方法。三總明

行成之相。⑥今初

佛告文殊師利。若菩薩摩訶薩於後惡世欲說是經。當安住四法。

⑦二解釋修行方法。四。初身安樂行。二口安樂行。

⑧三意安樂行。四誓願安樂行。⑨初中二。初長

文。二偈頌。⑩長文中二。初標。二釋。⑪今初

一者安住菩薩行處親近處能爲衆生演說是經。

諸理略說名行處卽約正行。附事廣說名親近處。

卽約助行。然說有廣略。理無淺深也。具如下釋。

⑤二釋二。初釋行處。二釋親近處。⑥今初。

文殊師利云。何名菩薩摩訶薩行處。若菩薩摩訶薩住忍辱地。柔和善順。而不卒暴。心亦不驚。又復於法無所行。而觀諸法如實相。亦不行不分別。是名菩薩摩訶薩行處。

釋此爲三。初約一法謂一實諦。次約二法。謂生法。

二忍。三約三法。謂不思議三諦也。初一實諦者。爲

一切所歸。爲一切作本。而徧無分別。爲一切所歸。

故云住忍辱地。諸法歸之。故名爲地。衆行休息。故

名忍辱。此卽行不行之行。如來衣也。理雖無行。依

理息。卽名不行。行卽不行。故云行於不行之行。爲一切作本。故云柔和善

順等。衆行得理而成。譬如萬物得地而生。若得理

本在。剛能柔。在逆能順。在暴能治。在驚能安。無量

功德。從中道一實地生。地無所生。而生功德。此卽

不行之行。如來室也。依理不行。而行不行。徧無分別。故云

又復於法等。謂了知行與不行。性相無二。見諸法

實名不分別。亦無不分別相。可得名爲亦不行不  
分別。卽是非行非不行之行。如來座也。

於法無所行。故云非

行。亦不行。不分別。故云非不行。無三行而三行。故名爲行。同一實

諦。故名爲處。初約一法。釋行處竟。次生法二忍者。

卽生法二空也。此與二乘不同。二乘生空。但破界

內我執。二乘法空。但破界內邪因緣。無因緣法執。

今明圓教二空。約十界假名。卽中道故。無復十界

假名。可得故名生空。約十界實法。卽中道故。無復

十界實法。可得故名法空。若更開者。卽爲四忍。謂

伏忍。順忍。無生忍。寂滅忍也。或爲五忍。則更加信

忍。或爲六忍。則更加和從忍。或對四十二地。則爲

四十二忍。一地卽有四十二地功德。一忍寧無四

十二忍法耶。今且約四忍消文。而與別教永異。別

教伏順二忍。是生忍位。則淺。無生寂滅二忍。是法

忍位。則深。圓教不爾。二忍四忍。悉通初後。何者。二

空之理。卽是中道。初修四忍。入于中道。見二空理。

乃至後心。亦祇窮二空理。故大經云。發心畢竟二

不別。若約無淺深判。四忍者。從初發心。圓伏五住。

法苑珠林卷十一  
至金剛頂皆名伏忍。初後悉不違實相故。皆名順  
忍。初後悉不起二邊心故。皆名爲無生忍。初後悉  
休息衆行故。皆名爲寂滅忍。凡夫在迷理卽二空  
四忍。聞經生解。名字  
二空四忍。圓伏五住。觀行二空四忍。六根清淨。相  
似二空四忍。四十一位分證。二空四忍。妙覺極果  
究竟二空經云。住忍辱地。卽住二空四忍地也。柔  
和卽伏忍。善順等。卽順忍。聞生死苦不匆卒畏懼。  
聞涅槃樂不匆卒求證。聞佛常與無常。二乘作佛  
與不作佛。生死涅槃異與不異。佛道長短難易。非  
長非短。非難非易等。皆不驚怖。故名順忍。又復於

法無所行而觀諸法如實相。卽無生忍。亦不行不  
分別。卽寂滅忍。前二名生忍。後二名法忍。從始至  
終。以二空理忍諸法。是著如來衣。安住二空理。是  
坐如來座。愍諸衆生。是人如來室。二空四忍名爲  
行。理卽是處。故云是菩薩行處也。次約二法釋行  
處竟。三約不思議三諦者。住忍辱地。總論三諦。如  
有地可據。方能忍辱也。柔和善順者。善順真諦。能  
忍界內界外。虛妄見愛寒熱等也。而不卒暴心。亦  
不驚者。安於俗諦。忍衆根緣稱適。機宜故不卒暴。

法華經疏十一  
體忍違從。故心不驚也。於法無所行等者。卽安中諦。能忍二邊。故云無所行。正任中道。故云觀如實相。亦不得中實。故云亦不行。不分別。此則據三諦之地名爲處。忍五任之辱名爲行。行亦爲三。謂止行卽行而不行。著如來衣。觀行卽非行。非不行。坐如來座。慈悲行卽不行。而行入如來室。是謂約三法釋菩薩行處。明弘經方軌也。

○二釋親近處。三。初約遠論近。二約近論近。三約非遠非近論近。遠近二字並去聲。讀是虛活字。○初約遠論

近是附戒門以助止觀成就慈悲。亦是廣上住忍辱地。行不行也。文爲十。初遠豪勢。乃至十遠畜養。於中九是生死。第五二乘一種是涅槃。二俱遠離。乃名親近中道。○初遠豪勢

云何名菩薩摩訶薩親近處。菩薩摩訶薩不親近國王王子大臣官長。恐始行人恃附勢力。失正道。故初似小益。久則大

損。○二遠邪人邪法

法苑珠林卷第十一  
不親近諸外道梵志尼犍子等及造世俗文筆讚詠外書及路伽耶陀逆路伽耶陀者

梵志亦云淨裔在家事梵者也尼犍此翻離繫出家外道之通名也路伽耶陀亦云韋陀西域外道典籍依于愛見而爲答釋者也逆者徵問之謂卽是依于愛見而爲問難者也正觀未成切須防斷恐其染習迷於正理

⑤三遠兇險戲

亦不親近諸有兇戲相戩相撲及那羅等種種變現

之戲

那羅此云力卽拚力戲也不親近者恐散逸故

⑥四遠旃陀羅

又不親近旃陀羅及畜豬羊雞狗畋獵漁捕諸惡律儀如是人等或時來者則爲說法無所希望

近旃陀羅令人無慈

⑦五遠二乘衆

又不親近求聲聞比丘比丘尼優婆塞優婆夷亦不問訊若於房中若經行處若在講堂中不共住止或

時來者隨宜說法。無所希求。

近二乘人。令人遠菩提故。西土大小兩乘。各居不雜。故云或來。既未受大。勿妨小志。故云隨宜說法。

丑六遠欲想

文殊師利。又菩薩摩訶薩。不應於女人身。取能生欲。想相而爲說法。亦不樂見。若入他家。不與小女處。女寮女等共語。

丑七遠不男

亦復不近五種不男之人。以爲親厚。

一、不男最能壞亂菩提志故。二、不男者。一生不男。謂胎中或初生時。便缺男根。三、不男。謂截去或爛壞等。三、不男。謂因他姪欲。乍有根起。而無根用。四、變不男。謂見男變女。見女變男。五、半不男。謂半月有用半月不能。皆宿造惡業。今感惡報。不任載道。非佛法器。故名重難。不得出家。亦不應與親厚。

丑八遠危害

不獨入他家。若有因緣須獨入時。但一心念佛。

法華會義十一  
十二  
獨入他家恐招危害。一心念佛障難悉除。

一 丑 九遠譏嫌

若爲女人說法。不露齒笑。不現胸臆。乃至爲法。猶不親厚。况復餘事。

律中若爲女人說法。須有男子知好惡者在旁。若無有知男子不得過五六語。皆是遠嫌避疑。勿令增他不善心也。

丑 十遠畜養

不樂畜年少弟子沙彌小兒。亦不樂與同師。

少年之人。習性未定。自畜則妨修正業。同師則媿亂請益故也。前文但云任忍辱地。是直緣理。今戒門廣出衆辱之緣。應修遠離。非持刀杖。亦不棄捨。但以正慧而遠離之。如是十法。諸教皆然。但離二乘諸教小異。今弘妙典。須屬圓人。觀心釋者。應作總別二種。總者。無非法界。何所可離。何所不離。非離非不離。而論離耳。還同非遠非近。而論近。初心雖了一切本無。而須數數近於遠離。別者。遠離三教。教主豪勢。二邊之法。卽是邪法。二邊人者。卽名

法華會義十一  
邪人。二觀神通名爲兇戲。三惑旃陀羅殺三智命。  
偏空滅想名二乘衆。偏觀真俗乃至中道法愛皆  
名欲想。滅色住空名爲不男。方便觀智皆害圓極。  
一切俗境名爲譏嫌。前三教善根名爲年少小兒。  
一一皆以所離爲境皆遠三惑而近三觀也。初約  
遠論近竟。

①二約近論近是附定門以助止觀成就慈悲。亦  
是廣上柔和善順而不卒暴心亦不驚不行行  
也。上直明不暴不驚。今廣出修定之心。修定之

處修定要門。以定力故。在暴而治在驚而安。  
常好坐禪。在於閑處修攝其心。支殊師利是名初親  
近處。

常好坐禪。是修定之心。好于中道實相禪法。卽五  
法中欲兼攝得精進念巧慧一心也。在於閑處是  
修定之處。卽五緣中處也。修攝其心。是修定要門。  
謂呵五欲。棄五蓋。調五事也。于二十五方便中。前  
文附戒門離十惱亂。卽第一持戒清淨。今云在於  
閑處。卽第三閑居靜處。旣在閑處。理必兼攝第四

息諸緣務。但略不言第二衣食具足第五得善知識耳。若約觀心明具五緣。則三觀爲禪。悅法喜爲食。諸佛菩薩六度。道品法性實際。皆爲善知識也。呵五欲者。謂色聲香味觸。皆是劫功德賊。淡知其過。休息貪染。棄五蓋者。謂貪欲瞋恚睡眠掉悔疑惑。蓋覆定慧。故須急棄。如剪毒樹。如檢偷賊。調五事者。謂調食不饑不飽。調眠不節不恣。調身不寬不急。調息不溢不滑。調心不沉不浮。此二十法。一一皆有事相。理觀具如摩訶止觀。須者尋之行。

五法者。欲得初禪。亦須五法。乃至諸禪。亦復如是。今約圓觀。則是欲從二邊正入中道。不雜二邊爲精。任運流入爲進。繫緣法界。一念法界爲念。修中觀方便名巧慧。息於二邊。心水澄清。能知世間生滅法相。是爲不二其心清淨常一。能見般若也。以此戒定二門爲前方便。是故結云初親近處。

⑤三約非遠非近論。近是附慧門以助止觀成就。慈悲亦是廣上於法無所行而觀諸法如實相。亦不行不分別。非行非不行也。文分爲三。初總

標境智。二別釋。三結成。（丑）今初

復次菩薩摩訶薩觀一切法空

觀者中道觀智也。一切法者十法境界也。空者不思議第一義諦也。若單論智。智無所觀。故舉一切以顯皆空。此空卽是諸法實相。唯佛與佛。乃能究竟。今菩薩初心。便以中道止觀而觀察之。所謂從始至終。皆以佛知佛見而爲修行。故能開示悟入中間永無諸委曲相也。

（丑）二別釋

如實相。不顛倒。不動。不退。不轉。如虛空。無所有性。一切語言道斷。不生。不起。無名。無相。實無所有。無量。無邊。無礙。無障。

如實相句。別釋所觀十法境界。不顛倒以下。別釋能觀中道智也。二邊三諦無一異。故名之爲如。非

七方便。故名爲實。以實爲相。故言如實相也。（二）邊

中必三諦。三而不三。名無一異。三諦如實。對七辨異。故云實耳。實卽無相。徧相一切。不顛倒

者。無凡夫常樂我淨四倒。無二乘無常苦無我不淨四倒。亦無出假常樂我淨四倒。卽是非榮非枯。

雙照榮枯。正中道觀也。不動者不爲二死所動也。不退者。心心寂滅。自然流入薩婆若海也。不轉者。不如凡夫輪轉生死。不如二乘轉凡爲聖也。如虛空者。但有名字。字不可得。中道觀智亦但有字。求不可得也。無所有性者。無自性。無他性。無共性。無無因性也。一切語言道斷者。離四句。絕百非。故不可思議也。不生者。惑智理皆不生。謂所破能破。稱理故。俱不生。則行位因果等皆不生也。不出者。如來所治全體。卽是故無。可出畢竟不復發也。不起

者。以入理故。一切方便理教皆寂滅也。無名者。一切名所不能詮。卽不顛倒。乃至不起。亦不足以名之也。無相者。一切相所不能狀。卽不顛倒。乃至不起。亦不足以形容之也。無名卽是性空。無相卽是相空。實無所有者。重歎觀體非二邊之有也。無量者。非陰入界等諸數法也。無邊者。非偏小等諸有分限法也。無礙者。徧入一切諸法也。無障者。無有一法能遮止之也。雖復多句。祇是能觀之智。無相無作。與所觀之境。稱實相應耳。

⑤三結成

但以因緣有從顛倒生故說常樂觀如是法相是名菩薩摩訶薩第二親近處

但以因緣有者結也。上直明中道觀慧。今明雙照二邊。理性畢竟清淨。如上所說。非解非惑。而從惑因緣生。生死從解。因緣生涅槃。生死涅槃。如六龍舞。從顛倒故有生死。由生死故有涅槃。故皆從顛倒生。由有生死涅槃。故有十界一切諸法可說。而十界一切諸法。畢竟皆空。皆如實相也。上直明中道觀慧者

多約雙非故也。然而豈有中道不照二邊。今此重明照于二邊。用結諸文。以顯中觀。不思議體。又

因緣有有於涅槃。從顛倒生。生於生死。由有涅槃。生死故有可說。而中道實相之體。證涅槃而非涅槃。在生死而非生死。終不可說。故菩薩常樂觀之。觀涅槃是真諦。生死是俗諦。涅槃生死所依之體。卽非涅槃。生死是中諦也。此分因緣顛倒而爲二邊。義則更顯。然生死正屬因緣。且從倒邊。故名顛倒。若達因緣。便有涅槃。故以初句判屬涅槃也。又三種涅槃。皆以觀因緣有。二種生死。皆從三惑顛倒而生。指迷歸悟。故有言說。又但以因緣有從顛倒生者。結不思議三諦境也。故說者不思議教也。

常樂觀者不思議三觀也。一切從因緣生顛倒之妙境說上中道妙觀。稟此妙法。無非妙境。由此本有說。常樂觀于如是妙境也。已上三節雙約境智

釋竟。今更通三節文。全約觀釋。初云觀一切法空如實相者。標觀體也。實相正是所觀。以所顯能觀。方有體故也。不顛倒下。皆釋觀相。不為二邊。八倒所動。故云不倒不動。不墮二乘。凡夫二地。故云不退不轉。非未來故不生。非過去故不出。非現在故不起。釋論云。如虛空無入無出。無任相。攝大乘亦爾。無未來入處。不從于現以入。未故。即是。不生。無過去出處。不從於現

以出過故。無現在任處。現在不任。即是。不起。餘皆如前可解。又經

文有十九句。初一句是總。後十八句對大品十八空。如實相。卽第一義空。不顛倒。卽內空。內無六入。我我所執。故不顛倒。不動。卽外空。外不為六塵所流動也。不退。卽內外空。十二入皆空。故言不退。不轉。卽空空。空破諸法。諸法是所破。空是能破。無復諸法。唯有空在。此空亦空。故言空空。空既空。故無復能轉。故言不轉也。如虛空者。卽是大空。執方計破。故言如虛空也。無所有性。卽畢竟空。諸法無遺。

餘故名畢竟空。以畢竟空故。無所有性也。一切語  
言道斷。卽一切空。一切空不可說。故語言道斷也。  
不生。卽有爲空。有爲是因緣和合。旣不合故不生  
也。不出。卽無爲空。無爲名出離。出離法空故名不  
出也。不起。卽無始空。求原初不可得故無起也。無  
名。卽性空。無相。卽相空。並可解。實無所有。卽不可  
得空。無量。卽有法空。有法則有量。有量旣空。故言  
無量也。無邊。卽無法空。無法則是邊表。今空故無  
邊也。無礙。卽有法無法空。二俱不可得。故言無礙

也。無障。卽散空。妨障不可得。故言無障也。十八空  
皆是中道正慧。皆名爲空。隨十八種境。故言十八  
耳。大經云。如來常修十八空義。故用十八空釋十  
八句也。復次。約十八空。旣可云初總後別。前約體  
相。亦可云總體別體。總相別相。復次。初雙約境智  
釋。次但全約觀釋。然觀必觀境。故可但全約觀。境  
能發觀。亦可但全約境。今更私作全約境釋。謂菩  
薩觀一切法。無不皆空。一切法皆如實相。一切法  
皆不顛倒。一切法皆不動。皆不退。皆不轉。一切法

法華會義十一  
二七  
皆如虛空無所有性。一切語言道斷不生不出不起。一切法皆無名。一切法皆無相。一切法皆實無所有。一切法皆無量。一切法皆無邊。一切法皆無礙無障。此顯百界于如諸法。一一無非實相。卽權而實卽俗而真也。但以因緣有從顛倒生故說此顯實相無相之體。隨染淨緣具造十界百界于如一切諸法。卽實而權。卽真而俗也。權實不二。乃是圓融不思議之二諦。其體相卽卽名爲一實諦。言空則一切皆空。言有則一切皆有。言中則一切皆

中。復名爲圓融三諦。非一二三。而一二三雖一二三。而真理不當名一二三。復名爲圓妙無諦。常樂觀如是法相。卽是正觀。不思議境是故結云。第二親近處也。問。前云行處是正行。親近處是助行。今第二親近處云何。卽名正觀。答。前不云乎。詣理略說。名行處。略說名正。附事廣說名親近處。廣說名助。說有廣略。理無淺深。圓家正助。正助並圓。直是非正非助。圓道妙理。約廣文能禪理。觀名爲助耳。初身安樂行中。初長文竟。

法華會義十一  
二七  
⑧二偈頌三。初頌標。二頌釋。三明行成。⑨今初爾時世尊欲重宣此義而說偈言。若有菩薩於後惡世。無怖畏心欲說是經。應入行處及親近處。

⑩二頌釋二。初頌約遠論近。二頌非遠非近。長文分釋行處親近處。頌中取意合頌不復次第。正顯文有廣略理非淺深也。⑪今初

常離國王及國王子。大臣官長。一兇險戲者。三及旃陀羅。四外道梵志。二亦不親近增上慢人。貪著小乘三藏學者。破戒比丘。名字羅漢。及比丘尼。好戲笑者。

深著五欲求現滅度。諸優婆夷皆勿親近。若是人等以好心來。到菩薩所。為聞佛道。菩薩則以無所畏心。不懷希望。而為說法。五兼第十家女處女及諸不男。皆勿親近。以為親厚。六亦莫親近。屠兒魁膾。咬獵漁捕。為利殺害。販肉自活。街賣女色。如是之人。皆勿親近。四又兇險相撲。種種嬉戲。諸淫女等。盡勿親近。又三莫獨屏處。為女說法。若說法時。無得戲笑。九入里乞食。將一比丘。若無比丘。一心念佛。八是則名為行處近處。以此二處能安樂說。

增上慢人。謂坐禪得小輕安。妄謂有所證得者也。  
貪著小乘三藏學者。謂專圖名相口耳學問。不肯  
觀心修證者也。名字羅漢。謂假名阿練若也。深著  
五欲。謂于色聲香味觸五塵之中。隨有偏嗜者也。  
求現滅度。謂但求小乘果證。無大慈悲者也。著五  
欲是生死邊。求滅度是涅槃邊。二皆勿近。應近中  
道明矣。此皆長文近處所列。而今結云行處近處。  
故知正助。但約廣略。決無淺深。

癸二頌非遠非近

又復不行。上中下法。有爲無爲。實不實法。亦不分別。  
是男是女。不得諸法。不知不見。是則名爲菩薩行處。  
別教名上法。通教名中法。藏教名下法。咸開入圓。  
無復藏通別法。可得故不行也。六凡法界。惑業苦  
等。名有爲有漏法。四聖法界。功德智慧。名有爲無  
漏法。十界真如平等之性。名無爲法。有爲色心。暫  
有體用。名爲實法。不相應行。依于色心分位。假立  
名不實法。又或有爲名不實法。性生滅故。無爲名  
實法。性不改故。或有漏名不實法。以違性故。無漏

名實法以稱性故。或一切實。二俱稱諦故。

有爲是俗諦。無

爲是

真諦。一切不實情有理無理有情無故。

有漏情之所有理之

所無以理無故名爲不實。無漏理之所有情之所無以情無故名爲不實。

今皆不行者。

由觀諸法如實相。則有爲亦實相。非復有爲。無爲

亦實相。非復無爲。實亦實相。非復是實。不實亦實

相。非復不實。故不行也。此頌於法無所行而觀諸

法如實相也。亦不分別。是男是女者。男卽是慧女

卽是定。定慧之法性本絕言。故不可分別也。不得

諸法者。常自寂滅相故。不知不見者。遠離能取所

一取戲論相故。此頌亦不行不分別也。

一切諸法空無所有。無有常任。亦無起滅。是名智者

所親近處。

此略頌觀一切法空等文也。無有常任。遮於真諦。

亦無起滅。遮於俗諦。真俗雙遮。正顯中道。言略意

周矣。

顛倒分別諸法有無。是實非實。是生非生。在於閑處

修攝其心。安住不動。如須彌山。觀一切法皆無所有。

猶如虛空。無有堅固。不生不出。不動不退。常住一相。

是名近處

此頌從顛倒生故說以爲所觀之境兼頌約近論  
近以爲方便然後重頌正觀一切法空等也上文  
附戒附定合爲初親近處慧名第二親近處今以  
定慧合頌而頌戒門則雙結行近正顯三學互融  
事理不二也問上云無有常住今云常住一相何  
也答若對起滅而言常住則是情計是故須破情  
計破已理本常住又對起滅而言常住則有二相  
今一切法皆無所有則無起無滅當體常住故名

一相一相卽實相實相卽諸法而非諸法諸法卽  
非法故名實相也二頌釋竟

⑤三明行成三初標行成二釋行成而得安樂三

頌總結 癸今初

若有比丘於我滅後入是行處及親近處說斯經時  
無有怯弱

事成則外儀無失理成則內心無滯故無怯弱也

癸二釋行成而得安樂

菩薩有時入於靜室以正憶念隨義觀法從禪定起

法華會義十一  
二十五  
爲諸國王王子臣民婆羅門等開化演暢說斯經典  
其心安隱無有怯弱

此釋安樂之因因修禪定止於過惡得人無我外  
則不損因修智慧離諸取著得法無我內無顛倒  
是以心不怯弱不怯弱名安樂也

⑤三頌總結

文殊師利是名菩薩安住初法能於後世說法華經  
初身安樂行竟

⑥二口安樂行二初長文二偈頌表⑦初中二初

標二釋 ⑧今初

又文殊師利如來滅後於末法中欲說是經應任安  
樂行

⑨二釋爲二初止行二觀行止行防非是如來衣

觀行說法是如來座又止行拔苦觀行與樂是  
如來室也 ⑩初止行又四初不說過二不輕

慢三不歎毀四不怨嫌 ⑪今初

若口宣說若讀經時不樂說人及經典過

人雖有過于我何與祇應內省何暇非他若喜談

人過者如揚糞穢。自薰薰他。損惱實重。非安樂行也。一切經典。皆是如來方便隨宜所說。如食石蜜。中邊皆甜。安得有過。說經典過。皆由不解權實妙理。故亦非安樂行也。

③二不輕慢

亦不輕慢諸餘法師

不倚圓而蔑偏。不重實而輕權。佛尚以異方便助

顯第一義諦。豈可自恃不護物機。

④三不歎毀

不說他人好惡長短。於聲聞人亦不稱名說其過惡。亦不稱名讚歎其美。

人皆惡聞其短。故不譚短。面譽彼人。則如對毀此人。故不稱長大論云。自讚者是貢高人。自毀者是妖惑人。讚他者是諂佞人。毀他者是讒賊人。智者應以四悉籌量而護自他。又日藏經云。初中後夜減省睡眠。精進坐禪。誦經修道。背捨生死。向涅槃路。不稱他短。不說己長。謙下卑遜。不自倚高。衣服知足。不放逸行。繫念思惟。心不馳散。於一切衆生。

起慈悲心。此皆安樂行之相也。於聲聞人等者。根性不定。若歎二乘。或令彼退。大取小。若毀訾二乘。或令彼大小俱失。兩無所取也。

○四不怨嫌

又亦不生怨嫌之心。

若謂彼人彼法妨害我道。卽是怨心。若謂彼人彼法鄙劣。卽是嫌心。心機一動。聲說卽發。杜說過之源。故不生怨嫌心也。大集經云。過去拘留孫佛法中。有一比丘發菩提心。誦持大小乘法。聚各八萬

四千。意嫌頭陀比丘。不誦經典。猶如株杙。由此墮獄。受大苦惱。從地獄出。受羅刹身。至賢劫佛樓至佛時。方脫鬼身。常人尚爾。况安樂行爲弘大典。將護小行。安得不慎其心念耶。怨怪嫌責。怨深嫌淺。淺深俱捨。方稱正行。此口安樂行所言心者。爲制口故。初止行竟。

○二觀行

善修如是安樂心。故諸有聽者。不逆其意。有所難問。不以小乘法答。但以大乘而爲解說。令得一切種智。

觀諸法空無所取著。心不苟執。不逆人意。不違法相。故不以小乘法答。若見無大機而爲說小。則令得方便益。若不見無大而爲說小。則恐妨其大緣。故深位有知機之智。則可隨宜說法。始行無鑒物之能。但可說大乘法也。口安樂行初長文竟。

①二偈頌三。初頌標。二頌釋。三明行成。②今初。爾時世尊欲重宣此義而說偈言。

菩薩常樂安隱說法。於清淨地而施牀座。以油塗身。澡浴塵穢。著新淨衣。內外俱淨。

長文但云應住。此中別出行相。安隱說法欲令前人得安隱道。及安隱果。卽入如來室也。於清淨地而施牀座。卽坐如來座也。以油塗身四句。卽著如來衣也。以此三法而尋口業名安樂行。

③二頌釋。二。初頌止行。二頌觀行。④初中四。初頌二不輕慢。二頌三不歎毀。三頌初不說過。四頌四不怨嫌。長文俱約止善說頌中。皆約行善說也。

⑤今初

安處法座隨問爲說

慢則不隨隨卽不輕慢意

①二頌三不歎毀

若有比丘及比丘尼諸優婆塞及優婆夷國王王子羣臣士民以微妙義和顏爲說若有難問隨義而答但依于義不譚人好惡也隨義答者有二。一可答。二不可答。若問答相難詰相上下若勝負則自知是爲智者語。一可答也。若自放恣敢有違者誅之是爲王者語。若長短是非皆不知惟覓勝而已。是爲愚者語。二不可答也。

②三頌初不說過

因緣譬喻敷演分別。以是方便皆使發心。漸漸增益入於佛道。

若樂說人及經典過生人毒念。今不說過故使發心入於佛道。佛道從喜生也。

③四頌四不怨嫌

除懶情意及懈怠想。離諸憂惱慈心說法。無怨嫌心起則解懶憂惱。今慈心說法則精進歡喜也。初頌止行竟。

癸二頌觀行

晝夜常說無上道教。以諸因緣無量譬喻。開示衆生。咸令歡喜。衣服卧具。飲食醫藥。而於其中。無所希望。但一心念說法因緣。願成佛道。令衆亦爾。是則大利安樂供養。

說無上道。卽頌但以大乘法答。願成佛道。令衆亦爾。卽頌令得一切種智也。二頌釋竟。

⑤三明行成。四初標行成。二明內無過。則外難不生。三明內有善法。所以行成。四格量功德。

今初

我滅度後。若有比丘。能演說斯妙法。華經

⑥二明內無過。則外難不生。如無臭物。蠅則不來。心無嫉恚。諸惱障礙。亦無憂愁及罵詈者。又無怖畏。加刀杖等。亦無擯出。安任忍故。

⑦三明內有善法。所以行成。智者如是善修其心。能任安樂。如我上說。若內無過。如長文中說。若內有善。如偈中說也。

⑧四格量功德

其人功德千萬億劫。算數譬喻說不能盡。

二口安樂行竟

庚三意安樂行二。初長文。二偈頌。辛初中三。初

標。二釋。三結行成。壬今初

又文殊師利菩薩摩訶薩於後末世法欲滅時受持

讀誦斯經典者

壬二釋二。初止行。二觀行。止行是衣。觀行是座。按

苦與樂是室也。癸初中四。初不嫉誑。二不輕

罵。三不惱亂。四不諍競。子今初

無懷嫉妬諂誑之心

一不耐他榮。名為嫉妬。由貪故瞋。瞋垢之最重者也。

險曲罔他。名之為諂。藏逆露順。不任教誨。貪癡為

體。正與道相違也。矯現有德。以圖利養。名之為誑。

由貪癡故。墮邪命法。謬膺恭敬。招苦無窮。故此等

心。皆是學道大障。苟有其一。尚不能得二乘菩提。

况可弘通大法。上求下化耶。安樂行菩薩急須棄

之

子二不輕罵

法華會義十一

三七

亦勿輕罵學佛道者求其長短

彼既發心學佛便墮未來佛數縱令煩惱習性不同互有長短但取其長以自益勿求其短而忤彼也

③三不惱亂

若比丘比丘尼優婆塞優婆夷求聲聞者求辟支佛者求菩薩道者無得惱之令其疑悔語其人言汝等去道甚遠終不能得一切種智所以者何汝是放逸之人於道懈怠故

四眾各有求三乘人。所求三乘義攝藏通別之三教。此三教法皆是如來善巧方便。循循善誘爲實所施之權。四眾苟能依之求道。自可漸引歸圓。若自恃圓解。呵其去道尚遠。自恃薄有行門。呵其放逸懈怠。彼既被呵。便生疑悔。進不能薦取圓理。退不能遵守三權。是卽惱亂行人。招過不小矣。若具知根智眼。乃能與奪適宜。

④四不諍競

又亦不應戲論諸法。有所諍競。

名字位人。薄解文義。未能念念觀心。每于消文釋義而起諍競。只此諍競。便名戲論。何況縱恣習氣。言語嘲諷。濁亂心神。增長放逸。非安樂行。切須戒之。初止行竟。

○癸二觀行四。初大悲想。治嫉誑。二慈父想。治輕罵。

三大師想。治惱亂。四平等說法。治諍競。○子今

初

當於一切衆生起大悲想。

既起大悲善當拔苦。何忍嫉之。誑之。誑之。

○子二慈父想。治輕罵。

於諸如來起慈父想。

既學佛道。卽未來佛。佛卽我等大慈悲父。何可輕

罵求其長短。

○子三大師想。治惱亂。

於諸菩薩起大師想。於十方諸大菩薩。常應深心恭

敬禮拜。

三乘四衆無非菩薩。有化訓德。皆衆生師。常應深

心禮敬。何得惱令懷疑。

法華會義 一  
三四  
子四平等說法治諍競

於一切衆生平等說法。以順法故不多不少。乃至淺愛法者亦不爲多說。

文隨於義義隨文。名爲平等。平等則無偏執不起諍競也。以順法故不多不少。量機利鈍隨器而授也。多說便爲戲論。以彼不堪領解。徒費文辭。無實益故。若能領解。則如娑竭龍王雨注大海。乃至塵說刹說亦不爲多。二釋竟。

子三結行成

文殊師利。是菩薩摩訶薩。於後末世法欲滅時。有成就是第三安樂行者。說是法時無能惱亂。

此由止行成。故惡不能加也。

得好同學。共讀誦是經。亦得大衆而來聽受。聽已能持。持已能誦。誦已能說。說已能書。若使人書。供養經卷。恭敬尊重讚歎。

此由觀行成。故勝人來集也。意安樂行。初長文竟。

辛二偈頌二。初頌釋。二頌行成。略不頌標也。子

初中二。初頌止行。二頌觀行。

癸今初

爾時世尊欲重宣此義而說偈言

若欲說是經當捨嫉恚慢諂誑邪僞心常修質直行  
不輕蔑於人亦不戲論法不令他疑悔云汝不得佛  
初四句頌初不嫉誑恚慢二字嫉之本也邪僞二  
字諂誑之註脚也常修質直行正明對治門也第  
五句頌二不輕罵第六句頌四不諍競後兩句頌  
三不惱亂

癸二頌觀行

是佛子說法常柔和能忍慈悲於一切不生懈怠心

十方大菩薩愍衆故行道應生恭敬心是則我大師  
於諸佛世尊生無上父想破於憍慢心說法無障礙  
初一偈頌初大悲想第二偈頌三大師想次半偈  
頌二慈父想後半偈頌四平等說法初頌釋竟

壬二頌行成

第三法如是智者應守護一心安樂行無量衆所敬  
三意安樂行竟

庚四誓願安樂行二初長文二偈頌

辛初中二

初明行法二歎經 壬初又三初標二釋三結

行成

癸今初

又文殊師利菩薩摩訶薩於後末世法欲滅時有持是法華經者

○二釋爲三。初明誓願所緣之境。二明起誓願之由。三正立誓願。

○今初

於在家出家人中。生大慈心。於非菩薩人中。生大悲心。

已發三乘出世心者。名爲在家出家之人。全未發心。名爲非菩薩人。就發心中。未斷通惑。在三界內。

名在家人。已斷通惑。出三界。外名出家人。此收藏通三乘別四十心皆盡也。非菩薩人。卽收六道四生皆盡也。如此十法界境。各有苦集應拔。皆當起於大悲。各有道滅應與。皆當起於大慈。但已發心者。善芽旣萌。因其善而玉成之。故起大慈。此慈卽能拔三惑苦。未發心者。惡習偏強。因其惡而拯救之。故起大悲。此悲卽能與三德樂。是謂緣無作諦起無作誓也。

○二明起誓願之由

法華會義十一  
應作是念。如是之人。則爲大失。如來方便隨宜說法。不聞不知不覺不問不信不解。

如來方便隨宜說法者。通指一代時教。或頓或漸。或大或小。或圓或偏。或顯或密。或定不定。乃至或兼或但。或對或帶。或開或顯。或廢或立。一一皆是不可思議善巧方便。一一皆是隨順衆生所宜也。非菩薩人。則于權法不聞不知不覺。在家出家菩薩。則于妙法不問不信不解。不聞故無三乘聞慧。不知故無三乘思慧。不覺故無三乘修慧。不問故

無一乘聞慧。不信故無一乘思慧。不解故無一乘修慧。此皆迷本道滅而爲界內外種種苦集。不達苦集體卽道滅。所以爲起弘誓願之由也。

③三正立誓願

其人雖不問不信不解。是經我得阿耨多羅三藐三菩提時。隨在何地。以神通力智慧力引之。令得住是法中。

前明誓由雙舉無權實三慧。今但約無圓三慧而立誓者。實能攝權故也。但乏圓慧。尚在所愍。况彼

沉迷尤當哀憫神通力者如來衣如來室力不起  
滅定現諸威儀先以定動也智慧力者如來座力  
四辯莊嚴後以慧拔也引之令得任是法中則必  
爲實施權開權顯實二釋竟

○三結行成二初明離過二明利益 ○今初  
文殊師利是菩薩摩訶薩於如來滅後有成就此第  
四法者說是法時無有過失

起大慈悲是人如來室行成知諸菩薩非菩薩等  
失于權實三慧是坐如來座行成弘誓制心始終

不倦是著如來衣行成室行成故無瞋垢過失座  
行成故無諂誑過失衣行成故無懈怠過失自旣  
拔苦徧拔他苦義同止行成也

○二明利益又二初正明二釋結 ○丑今初

常爲比丘比丘尼優婆塞優婆夷國王王子大臣人  
民婆羅門居士等供養恭敬尊重讚歎虛空諸天爲  
聽法故亦常隨侍若在聚落城邑空閑林中有人來  
欲難問者諸天晝夜常爲法故而衛護之能令聽者  
皆得歡喜

室行成故人天供養隨侍聽法衣行成故諸天衛  
護無能難問座行成故聽者歡喜自既得樂徧與  
他樂義同觀行成也

丑二釋結

所以者何此經是一切過去未來現在諸佛神力所  
護故

三世諸佛同皆守護如是妙典說此經者安得不  
獲此大利益耶初明行法竟

壬二歎經二初就法略歎二約譬廣歎 癸今初

文殊師利是法華經於無量國中乃至名字不可得  
聞何況得見受持讀誦

諸佛出世懸遠難值正使佛出久默斯要是故聞  
名尚不可得况得見耶况受持耶况讀誦耶意顯  
今得見聞受持讀誦乃是不可思議因緣應須寶  
重如說修行也

癸二約譬廣歎二初不與珠譬二與珠譬 子初

中二初立譬二法合 丑初又五初威伏諸國

五惟不與珠 寅今初

法華會義十一  
文殊師利。譬如強力轉輪聖王。欲以威勢降伏諸國。輪王譬如來化世。諸國譬陰入界諸境也。

寅 二小王不順

而諸小王不順其命

小王譬見愛等諸煩惱魔。卽是寇盜。所謂林中王耳。未得無漏調伏。名不順其命。

寅 三起兵討伐

時轉輪王起種種兵。以往討伐。

戒如堅甲。定如營壘。慧如利器。七賢中方法爲前。

千軍。須陀洹斯陀含中方法爲次軍。阿那含阿羅漢

中方法爲後軍。所破者是三毒等分八萬四千之

寇盜。能破者是八萬四千法門之官兵。小乘八萬四千法蘊

寅 四有功喜賜

王見兵衆戰有功者。卽大歡喜。隨功賞賜。或與田宅。聚落城邑。或與衣服嚴身之具。或與種種珍寶金銀。瑠璃磚礫碼瑙珊瑚琥珀象馬車乘。奴婢人民。

田譬禪定。宅譬解脫。聚落譬初果。二果。邑譬三果。城譬涅槃。卽第四果。衣服譬慚忍善法。嚴身之具。

譬一切助道善法。種種七寶譬七科無漏道品。象馬車乘譬二乘盡智及無生智。奴婢譬神通。人民譬有漏善法。

④五惟不與珠

唯髻中明珠。不以與之。所以者何。獨王頂上有此一珠。若以與之。王諸眷屬必大驚怪。

有出分段機。發名小功勳。有出變易機。發爲大功勳。若未有。大勳忽賜髻珠。則眷屬驚怪。譬衆生大機未發。忽說此經。不惟二乘疑惑。卽菩薩亦驚怪。

也。初立譬竟

⑤二法合亦五。初合威伏諸國。五合唯不與珠。

⑥今初

文殊師利。如來亦復如是。以禪定智慧力得法國土。王於三界。

禪定智慧力得法國土者。禪定是慈忍行成。福德莊嚴解脫德也。智慧是空座行成。智慧莊嚴般若德也。以此二修而顯一性。合上轉輪聖王。雖是王胤。由有強力而得登極。故言得法國土。卽是證于

法華會義 卷一  
四十一  
常寂光土也。王於三界者。統攝實報方便同居三土。合上欲以威勢降伏諸國。令斷三惑。出二死。順法性也。

寅 二合小王不順

而諸魔王不肯順伏

同居三界。則有見愛魔王。方便三界。則有摩沙魔王。實報三界。則有無明魔王。皆不順法性也。

寅 三合起兵討伐

如來賢聖諸將與之共戰

一卽是七賢前軍。乃至四果後軍。與界內見愛煩惱戰也。

寅 四合有功喜賜

其有功者。心亦歡喜。於四衆中。爲說諸經。令其心悅。賜以禪定。解脫。無漏。根力。諸法之財。又復賜與涅槃之域。言得滅度。引導其心。令皆歡喜。

能降見愛。名爲有功。餘可知。

寅 五合唯不與珠

而不爲說是法華經

濁障雖除。大機未發。故不爲說也。初不與珠譬竟。  
①二與珠譬亦二。初立譬。二法合。②今初。  
文殊師利。如轉輪王。見諸兵衆有大功者。心甚歡喜。  
以此難信之珠。久在髻中。不妄與人。而今與之。

圓明如意珠王。譬中道實智體具三德。圓卽法身。  
德。明卽般若德。如意。兩寶卽解脫德。極果所宗。故  
在王頂。臣下從來所未聞見。故名難信。實爲權所  
隱。故云久在髻中。解髻卽開權。與珠卽顯實也。

③二法合

如來亦復如是。於三界中爲大法王。以法教化一切  
衆生。見賢聖軍與五陰魔。煩惱魔。死魔。共戰。有大功  
勳。滅三毒。出三界。破魔網。爾時如來亦大歡喜。此法  
華經能令衆生至一切智。一切世間多怨難信。先所  
未說。而今說之。

大集經云。知苦壞陰魔。斷集離煩惱魔。證滅離死  
魔。修道壞天子魔。此約小乘破界內四魔言也。然  
而小乘修出世道。但以天魔不能爲障。故云壞天  
子魔。其實未能降伏天魔。惟有如來應身八相成。

道示現降天魔耳。今云與五陰魔煩惱魔死魔共戰滅三毒出三界卽是分段功成。又云有大功勳破魔網卽是大乘機發故大歡喜而說此難信之妙經也。

文殊師利。此法華經是諸如來第一之說。於諸法中最爲甚深。未後賜與。如彼強力之王。久護明珠。今乃與之。文殊師利。此法華經諸佛如來秘密之藏。於諸經中最在其上。長夜守護不妄宣說。始於今日乃與汝等而敷演之。

旣以法合譬竟。又復提譬帖合。殷勤讚歎不一而足。欲令聞者作難遭想。依安樂行。敬愛持弘故也。誓願安樂行初長文竟。

⑧二偈頌二。初頌行法。二頌歎經。⑨初中二。初

起頌行成。二追頌行法。⑩今初

爾時世尊欲重宣此義而說偈言

常行忍辱衰愍一切。乃能演說佛所讚經。  
上總明行成。今頌別顯。初句頌著衣行成。次句頌入室行成。演說頌坐座行成也。

海華會義十一  
四十五  
癸 二追頌行法三。初頌誓願所緣之境。二頌起誓

願之由。三頌正立誓願。子 今初

後末世時持此經者。於家出家及非菩薩。應生慈悲

子 二頌起誓願之由

斯等不聞不信。是經則爲大失

子 三頌正立誓願

我得佛道。以諸方便。爲說此法。令住其中

初頌行法竟

壬 二頌歎經。但頌約譬廣歎。不頌就法略歎。又長

文兩譬兩合。今初總頌兩譬。二總頌兩合也

癸 初總頌兩譬

譬如強力轉輪之王。兵戰有功。賞賜諸物。象馬車乘。嚴身之具。及諸田宅。聚落城邑。或與衣服。種種珍寶。奴婢財物。歡喜賜與。如有勇健。能爲難事。王解髻中明珠。賜之。

先三偈頌不與珠譬。後一偈頌與珠譬

癸 二總頌兩合

如來亦爾。爲諸法王。忍辱大力。智慧寶藏。以大慈悲

法華會義十一  
如法化世。見一切人。受諸苦惱。欲求解脫。與諸魔戰。爲是衆生說種種法。以大方便說。此諸經。旣知衆生得其力已。末後乃爲說是法華。如王解髻明珠與之。此經爲尊衆經中上。我常守護不妄開示。今正是時。爲汝等說。

先三偈半。頌合不與珠。後三偈頌合與珠也。二解釋修行方法竟。

③三總明行成之相三。初結勸四行。二舉三報以

勸。三總結。

庚今初

我滅度後求佛道者。欲得安隱演說斯經。應當親近如是四法。

④二舉三報以勸。亦名三障清淨。復爲三。初報障轉轉現報。二業障轉轉生報。三煩惱障轉轉後報。

辛今初

讀是經者。常無憂惱。又無病痛。顏色鮮白。

常無憂惱轉現報之心。又無病痛等轉現報之色也。

⑤二業障轉轉生報。

不生貧窮卑賤醜陋

惡業之因。乃感惡果。持經則不作貧賤業。所以不生卑陋處也。

⑧三煩惱障轉後報二。初別明三煩惱障轉。二總明一切煩惱障轉。⑨初又三。初貪障轉。二瞋障轉。三癡障轉。

⑩今初

衆生樂見。如慕賢聖。天諸童子。以爲給使。

多貪欲者。則人忽慢。又復障生梵天。今貪欲障轉。故衆生敬慕。天童給使也。

⑪二瞋障轉

刀杖不加毒。不能害。若人惡罵口。則閉塞。遊行無畏。如師子王。

捨瞋則內除。刀箭入陣。則外刃不傷。

⑫三癡障轉

智慧光明如日之照。

初別明三煩惱障轉竟。

⑬二總明一切煩惱障轉四。初夢入十信相似位。四夢入妙覺究竟位。蓋安樂。既是如來之行。

故弘經者預表果成當知弘功其力不小。又百千萬億劫事咸在一念夢中。用表妙法不可思議。一中無量無量中。一是相前現後當尅果。一生弘教功超累劫也。○初夢入十信相似位。若於夢中。但見妙事。見諸如來坐師子座。諸比丘衆圍繞說法。又見龍神阿修羅等。數如恆沙恭敬合掌。自見其身而爲說法。

初二句總貫諸文。次四句見佛聞法表上求佛道也。後六句爲龍神等說法表下化衆生也。

○二夢入初住見道位

又見諸佛身相金色放無量光照於一切。以梵音聲演說諸法。佛爲四衆說無上法。見身處中合掌讚佛。聞法歡喜而爲供養。得陀羅尼。證不退智。佛知其心。深入佛道。卽爲授記成最正覺。汝善男子。當於來世得無量智佛之大道。國土嚴淨廣大無比。亦有四衆合掌聽法。

見身處中表入實也。聞法歡喜表悟圓因。所證與別歡喜地同也。得陀羅尼卽三總持。證不退智卽

三不退授記作佛卽無生現前記也

癸三夢入任行向地修道位

又見自身在山林中修習善法證諸實相深入禪定見十方佛

善法者稱性所起慧行及與行行卽是七科道品十波羅蜜四等四攝三昧總持等一切佛道也實相卽是中道中道非一非多由破四十品惑卽有四十分證中道故名證諸實相也深入禪定卽首楞嚴定不以二相見于如來故云見十方佛也

又後心菩薩入金剛定諸佛現前灌頂授職故云見十方佛

癸四夢入妙覺究竟位

諸佛身金色百福相莊嚴聞法爲人說常有是好夢又夢作國王捨宮殿眷屬及上妙五欲行詣於道場在菩提樹下而處師子座求道過七日得諸佛之智成無上道已起而轉法輪爲四衆說法經千萬億劫說無漏妙法度無量衆生後當入涅槃如煙盡燈滅夢八相佛寄顯妙覺也從須陀洹至辟支佛悉有

法華會義 十一  
夢。唯佛不夢無疑無習氣故。金光明最勝王經。明將證十地。皆先有夢。夢是獨頭意識。與睡眠心所合。幻現三世種種境界。所夢與過去事相應。卽是習氣影子。若與未來事相應。卽是吉凶先兆。今持經王。得此好夢。未來不虛。是吉兆也。一舉三報。以勸竟。

庚 三總結

若後惡世中。說是第一法。是人得大利。如上諸功德。原此安樂行品。特示初心弘法方軌。具含十乘觀。

法。今略點之。令緣心有在。觀諸法如實相。第一觀。不思議境也。於在家出家起大慈心。於非菩薩起大悲心。第二真正發菩提心也。三業各有止行。觀行第三善巧安心也。觀一切法空等。第四破法徧也。亦不行不分別。第五識通塞也。三業及誓願。卽圓四念處。依此圓斷二惡而生二善。成就如意根力。覺道第六調適道品也。離十惱亂等。第七對治助開也。夢中所見。表第八位次也。而不卒暴。心亦不驚。第九能安忍也。於法無所行。第十離法愛也。

法華會義十一  
五十一  
通括四行十觀略周。又細論之。則一一行中。並具十法。又十法爲正。四行助之。若四若十。並涉因果。又四行爲總。十觀爲別。若總若別。俱通橫豎。十法導理。無不克終。四行事儀。豈局在始。圓道妙行。終始無殊。六卽義明。措足有地。初迹門開。權顯實竟。妙法蓮華經台宗會義卷五之一

弟子

陳傳融喜助伍兩

車 迎喜助伍兩

求薦先妣翁氏往生  
阿彌陀佛極樂世界

佛弟子車淨直募造

妙法蓮華經台宗會義卷五之二

古吳後學溥益智旭述

釋安樂行品竟次釋從地涌出品

從地涌出品第十五

師嚴道尊。鞠躬祇奉。如來一命。四方奔踊。故言從地涌出品。道在師。故道尊。師有道。故師嚴。師嚴故命不可違。道尊故有命必赴。命者。一由寶塔品末云。佛欲以此妙法華經付囑。有在此。命猶通。二由此品之初。他方菩薩請弘。佛止之曰。我等娑婆世界。自有六萬恒河沙等。卽別命也。此世界悉檀也。三世化物。惠利無疆。一月萬影。孰能思量。召過以示現。弘經以益當。故

言從地涌出品。爲人悉檀虛空湛然無早無晚。或者執

迹而闢其本。召昔示今。破近執而顯遠事。故言從

地涌出品。虛空譬理。理無早晚。依理成事。事有本迹。或執近迹以失遠本。本迹尚迷。况不思議一。故本弟子居下虛空。本地之師經久虛空。今之師弟在今虛空。久空今空。下空上空。雖則體一。然本弟子元知近迹。今之弟子猶迷遠本。爲破近執。召昔示今。今弟子因疑致請。聞說方破。執近之惡對治悉也。寂場少父。久服種智。還年之藥。故老而若

少。寂光老兒。亦久稟常住不死之方。故少而若老。

示其藥力。咸令得知。故言從地涌出品。第一義悉文云。

是從何所來。以何因緣集。當知四悉檀因緣故涌

出也。然初一悉。文在今品。第二意兼後品。三四二見本故也。故知世界。卽後三悉之由。今涌出品。專在世界。

②二本門開近顯遠三。初從此至汝等自當因是

得聞。是序段。二從爾時釋迦牟尼佛告彌勒菩薩

下。訖分別功德品。初彌勒說偈。是正說段。三

從爾時佛告彌勒。訖常不輕品。共三品半。是流

通段。③初序爲二。初涌出。二疑問。④初中

三。初他方菩薩請弘經。二如來不許。三下方涌

出。⑤今初

法華會義卷二

七

東京大学総合図書館所蔵

爾時他方國土諸來菩薩摩訶薩。過八恒河沙數。於大衆中起。合掌作禮。而白佛言。世尊。若聽我等於佛滅後。在此娑婆世界。勤加精進。護持讀誦書寫供養。是經典者。當於此土而廣說之。

他方菩薩已聞迹門說流通竟。慕此通經勝福。故願任此弘宣也。

⑤二如來不許

爾時佛告諸菩薩摩訶薩衆。止。善男子。不須汝等護持此經。所以者何。我娑婆世界。自有六萬恒河沙等。

菩薩摩訶薩。一一菩薩各有六萬恒河沙眷屬。是諸人等。能於我滅後。護持讀誦廣說此經。

如來止之。凡有三義。一者汝等各各自有已任。若任此土。廢彼利益。二者他方菩薩。此土結緣事淺。雖欲宣授。必無巨益。三者若復許之。則不得召下。下若不來。不得破近顯遠也。問。諸佛菩薩分身散影。普徧十方。誘化一切。有何彼此。而言已任及廢彼耶。答。佛菩薩心實無彼此。但機有在。無始法爾。初從此佛菩薩結緣。還於此佛菩薩成熟。由此

須召下方也。召下方來。亦有三義。一者是我弟子。應弘我法。二者以緣深廣。能徧此土。徧分身土。而作利益。三者得開近顯遠也。各有已任。無世界益。不得破近。無對治益。不得顯遠。無第一義益。以無四益。所以止之。子弘父法。有世界益。結緣深廣。有爲人益。開近。有對治益。顯遠。有第一義益。具有四益。所以召之。

⑤ 三下方涌出。二。初經家敘相。二。明問訊。⑥ 初中五。初涌出。二。身相。三。住處。四。聞命。五。眷屬。

⑦ 今初

佛說是時。娑婆世界三千大千國土。地皆振裂。而於

其中。有無量千萬億菩薩摩訶薩。同時涌出。

地覆本時。眷屬如迹隱本。今開迹顯本。故裂地以表之。

⑧ 二身相

是諸菩薩。身皆金色。三十二相。無量光明。

⑨ 三住處

先盡在此娑婆世界之下。此界虛空中住。

在此世界之下。則不屬此世界。此界虛空中住。則不屬彼下界。非此非彼。卽表中道。常寂光土也。常

法華會義十一  
四  
卽常德。寂卽樂德。光卽淨我。常卽法身。寂卽解脫。光卽般若。三德無不常樂。我淨四德無非卽空假中。是爲不縱不橫秘密之藏。不卽此界不離此界。故以世界之下此界虛空表之。任者以不住法住於秘藏也。當知本有四德以爲所依。修得四德以爲能依。能所並有能依之身。依於能所所依之土。二義齊等。方是毘盧遮那身上之相。是故一人成佛時法界皆爲此佛之依正。一佛旣爾當知一切諸佛亦復如是。重重互徧。重重互入。重重互現。重

重互融。又諸佛旣爾當知一切菩薩之所分證。亦復如是。又諸佛菩薩滿分修德旣爾當知一切衆生所有性德亦復如是。無不互徧互入互現互融。但迷悟攸分故卽而常六。然法性平等故六而常卽。所以阿鼻依正全處極聖之自心。遮那身上不離下凡之一念也。

庚四聞命

是諸菩薩聞釋迦牟尼佛所說音聲從下發來。卽是聞命故來。弘法故來。破執故來。顯本故來也。

庚 五眷屬

一 一菩薩皆是大衆唱導之首。各將六萬恒河沙眷屬。况將五萬四萬三萬二萬一萬恒河沙等眷屬者。其數轉多。况復乃至一恒河沙。半恒河沙。四分之一。乃至千萬億那由他分之一。其數轉多。况復千萬億那由他眷屬。其數轉多。况復億萬眷屬。其數轉多。况復千萬百萬乃至一萬。其數展轉倍多。况復一千一百乃至一十。其數展轉倍多。况復將五。四。三。二。一弟子者。其數展轉倍多。况復單已樂遠離行。其數展轉倍多。如是等比。無量無邊。算數譬喻所不能知。

一 一皆是導師之德。能引衆人至於寶所。當知一已非獨。六萬恒沙眷屬非多也。若約法門者。一卽一道清淨。二卽福智。三卽戒定慧。四卽四諦。五卽五眼。六卽六度。一一度具十法界。一一界各有十十。卽有百。百卽具千。十善卽有萬。二度具萬。六度卽六萬法門。多不爲多。一不爲一。非多非一。而多而一。初經家敘相竟。

② 二明問訊五。初三業供養。二陳問訊之辭。三佛答安樂。四偈頌隨喜。五如來述歎。庚 初中三。

初正明供養。二明所經時節。三明佛神力加持。

○今初

是諸菩薩從地出已。各詣虛空七寶妙塔。多寶如來。釋迦牟尼佛所到已。向二世尊。頭面禮足。及至諸寶樹下。師子座上佛所。亦皆作禮。右邊三市。合掌恭敬。以諸菩薩種種讚法。而以讚歎。任在一面。欣樂瞻仰。於二世尊。

作禮右邊。是身業供養。種種讚歎。是口業供養。欣樂瞻仰。是意業供養。以此不思議三業。供不思議。

三身而為能感。故佛以神力應之。令諸大眾長時。謂短。即狹見廣也。

○二明所經時節

是諸菩薩摩訶薩。從初涌出。以諸菩薩種種讚法。而讚於佛。如是時間。經五十小劫。是時釋迦牟尼佛默然而坐。及諸四眾。亦皆默然。

種種讚法。而讚於佛。遂經五十小劫。何止百千恒河沙徧。故知梵文積至八里。未足為多也。問。釋迦住世。僅八十年。說法四十九載。相傳八年。說法華。

法華會義  
經。何得有此五十小劫。答。如維摩丈室得容三萬二千師子之座。一一座高八萬四千由旬。既橫論大小。小可容大。則豎論久暫。豈不容久耶。問。若爾。則是延半日以爲五十小劫也。何故下云佛神力故。令諸大衆謂如半日。答。非延半日而爲五十小劫。乃納五十小劫于半日中。亦猶遠將燈王國中大師子座而入丈室。非變丈室爲師子座也。問。時無實法。長短本空。何得戲論有納入耶。答。若約真諦。則大小久暫。悉皆平等。若約俗諦。則大小久

暫。仍自歷然。若約迷情。不知全俗卽真。故言俗之時。則大自大。小自小。久自久。暫自暫。不相容攝。言真之時。則一味掃蕩。若約諸佛菩薩。了達真俗不二。故不惟一事攝一切理。而且一事攝一切事。所以丈室容師子座。師子座不小。丈室不大。則知半日容五十劫。五十劫不促。半日不延也。又若論寂光實報境界。則下方菩薩常面稱揚。如來默然。常受其讚。盡未來時。無有疲厭。亦不休歇。若論同居穢土機緣。則任世八旬事。須唱滅。故令大衆謂如

法華會義 卷十二  
半日。若論方便淨土機緣。則已破三界見思未破。無明別惑。應見菩薩讚歎經五十劫。是知卽此靈山橫論四土。衆生福薄。見佛入滅。是同居士相也。五十小劫讚歎于佛儼然未散。方便土相也。於阿僧祇劫常在靈鷲山。衆生見劫盡。我此土安隱。實報寂光土相也。問。若方便土。菩薩讚歎五十小劫。今猶未散。則此後十三品經。何從得有答。佛之神力。不可思議。爲彼示長。爲此示短。三世互入。亦無所在。如安樂行人。一夢尚可經于千萬億劫。豈不

能攝未來之事。令入現在。俾此土衆生得沾滅後流通益耶

○三 明佛神力加持

五十小劫。佛神力故。令諸大衆謂如半日。爾時四衆亦以佛神力故。見諸菩薩徧滿無量百千萬億國土。虛空。

若約真諦則時劫本空。今約俗諦則五十小劫是實。故已破無明者。知是五十小劫。未破無明者。不堪耐久。由佛神力。令其謂如半日。不生疲倦也。又

諸菩薩徧滿無量國土虛空。豈惟肉眼不能遠矚。縱令天眼。何可盡瞻。而今四衆以佛神力。則能徧見。當知長而謂短。由迷情未祛。狹而見廣。由妙機當發。又長而謂短。意表本爲迹。隱此迹。須開狹而見廣。意表迹。合於本。此本須顯。又自佛眼觀。則長短平等。廣狹平等。如理則非本非迹。自四眼觀。則解者見長見廣。如知遠本。惑者見短見狹。如執近迹。今迷長謂短。亦云佛之神力。是顯佛能隨情。卽狹見廣。亦云佛之神力。是顯佛能破情。又壽量未

談故長令見短。下方已涌。故狹令見廣。夫見兩猛。知龍大。見華盛。知池深。見所化如此之多。則知能化甚大久遠。旣開顯已衆。豈終惑。所以下文神力品中。滿百千歲。然後還攝舌相。不復更云。謂如半日也。初三業供養竟。

庚二陳問訊之辭

是菩薩衆中。有四導師。一名上行。二名無邊行。三名淨行。四名安立行。是四菩薩。於其衆中。最爲上首唱導之師。在大衆前。各共合掌。觀釋迦牟尼佛。而問訊。

法華會義十一  
言。世尊。少病少惱。安樂行不。所應度者。受教易不。不令世尊生疲勞耶。爾時四大菩薩而說偈言。

世尊安樂。少病少惱。教化衆生。得無疲倦。又諸衆生。受化易不。不令世尊。生疲勞耶。

初標四導師者。欲擬開示悟入四十位耳。如華嚴經。但舉法慧。德林。金剛幢。金剛藏。說四十位也。四皆名行者。安樂行成也。上行者。開佛知見。超于九界也。無邊行者。示佛知見。一行一切行也。淨行者。悟佛知見。事理融妙也。安立行者。入佛知見。自安

安他。猶如大地也。問辭有長文重頌。各有二意。一問如來安樂。二問衆生易度。安樂卽自行。易度卽化他。自行化他。總不出于衣座室三。衣座室三。卽安樂行。前品用勗。始行菩薩。今地涌問佛。亦不過云。安樂行不而已。故知圓行。始終理同。佛是究竟安樂行。菩薩是分證安樂行。前品是明觀行安樂行。乃至一切衆生。無非理卽安樂行也。

庚 三佛答安樂

爾時世尊於菩薩大衆中而作是言。如是如是。諸善

法華會義十二  
男子。如來安樂。少病少惱。諸衆生等。易可化度。無有疲勞。所以者何。是諸衆生。世世已來。常受我化。亦於過去。諸佛恭敬尊重。種諸善根。此諸衆生。始見我身。聞我所說。卽皆信受。入如來慧。除先修習學小乘者。如是之人。我今亦令得聞是經。入於佛慧。

佛答安樂易度兩事相成。安樂故易度。易度故安樂也。所以者何。下釋成易度之由。由諸衆生。世世受化故也。然有二種。一者種諸善根。則始見我身。聞說華嚴。卽皆信受。入如來慧。或聞方等般若。亦

入佛慧。二者先修習小。則漸漸調伏。來至法華。亦

令聞經。得入佛慧。

方等般若。小乘亦有密得入者。但不彰灼。故此不言。是知

華嚴方等般若。法華佛慧不殊。不當優劣。然佛慧雖同。教相稍異。且約華嚴法華對辨。略明十異。第

一。始見今見。華嚴初成道時。名爲始見。法華久後說實。故名今見。始見今見。佛慧不殊也。第二。開合不開合。華嚴日照高山。卽說於頓。故不須開合。爲不入者。開頓說漸。展轉調伏。令漸歸頓。故法華爲開已得合。開合雖殊。二頓無別也。第三。橫豎廣略。

法華會義十二  
十一  
華嚴頓直豎入。入於法界。故言豎廣。不歷方便。故言橫略。法華備歷五味。卽是橫廣。得入佛慧。亦是豎廣。然旣入法界。自當通達一切方便。二經不殊也。第四本迹不同。華嚴以遮那爲本。千百億釋迦爲迹。法華以久成爲本。寂場爲迹。則華嚴之本。祇是法華之迹。又華嚴雖云或見如來。初成道。或見如來成道。已無量劫。意亦密顯于本。而未彰灼。明言成道久遠若斯。是則非本非迹。法界理同。久本近迹。隱顯事異也。第五加說不加說。華嚴唯阿僧

祇及隨好品。是佛自說。餘皆菩薩被加而說。法華迹門三周。本門壽量等。並佛自說。雖加說自說。理常平等。而化儀有異也。第六變土不變土。華嚴卽穢而淨。表圓直大道。故不須變。法華轉穢爲淨。表會權歸實。故須三變。若變不變。淨土不毀。則無殊也。第七多處不多處。華嚴七處九會。是爲多處。法華靈鷲虛空。故不多處。處雖多少。理常平等也。第八斥奪不斥奪。華嚴初會。永無聲聞。故無斥奪。法華正破小執。故有斥奪。又入法界品。二乘如聾如

法華會義十二  
十三  
癩故有斥奪。法華皆與佛記。故無斥奪。華嚴但被  
界外兩機。如醫輕重兩種不死之病。收功猶易。法  
華能治定性聲聞。如令敗種復生于芽。收功更奇  
也。第九直顯開顯。華嚴行大直道。名直顯實。法華  
決了聲聞法名開權顯實。所顯之實終無二也。第  
十根利根鈍。利者華嚴卽悟。鈍者法華方悟。利鈍  
雖殊。悟理則一。能令鈍悟功亦倍難也。緣宜不同  
略爲十異。種智法界等無差別。故云始見我身聞  
我所說。卽皆信受。入如來慧。除先修習學小乘者

我今亦令得聞。是經入於佛慧。明文在茲。不須疑  
也。諸師見其緣異。逐緣異解。迷不知反。去道轉遠。  
若識理同。千車共轍。佛慧無殊也。然華嚴兼別以  
明佛慧。方等對三以明佛慧。般若帶二以明佛慧。  
唯有法華開彼所兼所對所帶。乃至三藏但生滅  
法。咸成佛慧。是則所詮圓理。彼此無殊。能詮之教  
純雜有異。獨稱爲妙。良不虛也。舊云華嚴了義滿  
字常任。法華不了義。非滿非常。今以此文並之。若  
始入是了義。今入不了義者。亦應始入是佛慧。今

法華會義十一  
十四  
入非佛慧若佛慧既齊則了義亦等滿常亦然又  
地人呼華嚴爲圓宗法華爲不真宗今亦用此文  
並之

庚四偈頌隨喜

爾時諸大菩薩而說偈言

善哉善哉大雄世尊諸衆生等易可化度能問諸佛  
甚深智慧聞已信行我等隨喜

能問者如華嚴方等般若經中俱有當機問法菩  
薩乃至法華經中身子三請俱是能問也所問者

卽甚深智慧所謂如來慧也

庚五如來述歎

於時世尊讚歎上首諸大菩薩善哉善哉善男子汝  
等能於如來發隨喜心

菩薩隨喜能問能信之人佛乃歎其能於如來發  
隨喜心意顯諸能問者皆是古佛示迹故菩薩隨  
喜其迹如來述歎其本亦是密顯壽量也初涌出  
序竟

丁二疑問序二初此土菩薩疑問二他土菩薩疑

問 (戊)初中二。初長文敘疑念。二偈頌正發問

(巳)今初

爾時彌勒菩薩及八千恒河沙諸菩薩衆皆作是念我等從昔已來不見不聞如是大菩薩摩訶薩衆從地涌出住世尊前合掌供養問訊如來

彌勒及菩薩衆咸疑念者凡有四意。一者自寂場以後今座以前十方大士來會不絕雖不可限我以補處智力悉見悉知何於此衆不識一人又我遊化十方奉觀諸佛一切海會咸所詣知就歷履

處亦所不識若來若去推求不識不識則無世界益故須疑問。二者彼諸大士是前進先達彌勒是後番末學後不知前例如文殊不知入定女人境界女人不知棄諸陰蓋菩薩境界以不識故不知彼之內善自善不生無爲人益故須疑問。三者彼等大士本實相底應現十方別頭教化所有真應皆非彌勒境界既不識彼利物之道卽不識病無對治益故須疑問。四者佛託弘經召諸大士大士奉師嚴命故來密開壽量非時衆之所知既不識

法華會義卷十二  
十一  
如來密旨則無第一義益故須疑問也然彌勒迹  
居補處本亦應深何當如此不識凡有二義若約  
實論則近成補處不知久本若約權論則本高迹  
下爲物騰疑也

②二偈頌正發問四初問來處來緣至四結請決

疑人庚今初

時彌勒菩薩摩訶薩知八千恒河沙諸菩薩等心之  
所念并欲自決所疑合掌向佛以偈問曰

無量千萬億大衆諸菩薩昔所未曾見願兩足尊說

是從何所來以何因緣集巨身大神通智慧叵思議  
其志念堅固有大忍辱力衆生所樂見爲從何所來  
一問何處來二問何因緣來也巨身大神通是歎  
入如來室智慧叵思議是歎坐如來座其志念堅  
固有大忍辱力是歎著如來衣三皆自行德也衆  
生所樂見是歎化他德也

③二敘眷屬數量

一一諸菩薩所將諸眷屬其數無有量如恒河沙等  
或有大菩薩將六萬恒沙如是諸大衆一心求佛道

法華會義十一  
十七  
是諸大師等六萬恒河沙俱來供養佛及護持是經  
將五萬恒沙其數過於是一四萬及三萬二萬至一萬  
一千一百等乃至一恒沙半及三四分億萬分之一  
千萬那由他萬億諸弟子乃至於半億其數復過上  
百萬至一萬一千及一百五十與一十乃至三二一  
單已無眷屬樂於獨處者俱來至佛所其數轉過上  
如是諸大衆若人行籌數過於恒沙劫猶不能盡知  
庚三問師法是誰

是諸大威德精進菩薩衆誰爲其說法教化而成就

從誰初發心稱揚何佛法受持行誰經修習何佛道

庚四結請決疑又四初結歎至四明大會同請

辛今初

如是諸菩薩神通大智力

辛二請答來處

四方地振裂皆從中涌出世尊我昔來未曾見是事  
願說其所從國土之名號我常遊諸國未曾見是衆  
我於此衆中乃不識一人

辛三請答來緣

忽然從地出願說其因緣

辛 四明大會同請

今此之大會無量百千億是諸菩薩等皆欲知此事是諸菩薩衆本末之因緣無量德世尊唯願決衆疑既云欲知本末因緣則若所師若來處若來緣總求佛答明矣初此土菩薩疑問竟

戊 二他土菩薩疑問

爾時釋迦牟尼分身諸佛從無量千萬億他方國土在於八方諸寶樹下師子座上結加趺坐其佛

侍者各各見是菩薩大衆於三千大千世界四方從地涌出住於虛空各白其佛言世尊此諸無量無邊阿僧祇菩薩大衆從何所來爾時諸佛各告侍者諸善男子且待須臾有菩薩摩訶薩名曰彌勒釋迦牟尼佛之所授記次當作佛已問斯事佛今答之汝等自當因是得聞

分身眷屬橫在十方亦復不知本地未有四益故與彌勒同其疑問諸佛皆不爲答抑待釋迦答彌勒者彌勒所問事迹不輕釋尊一代未曾顯說因

法華會義十二  
十九  
茲答問廣顯長壽。此大玄秘。須待釋迦自開。汝目當聞。分身來集本爲證明。故不應答也。初本門序段竟。

②二正說段二。初誠許。二正說。①初中二。初長

文。二偈頌。④長文又三。初述歎。二誠。三許。

⑤今初

爾時釋迦牟尼佛告彌勒菩薩善哉善哉阿逸多。乃能問佛如是大事。

初一善哉述其上契佛心。次一善哉述其下契羣

念。開迹顯本。乃一代時教所未顯談。故爲佛之大  
事。又須約修德果位。深遠不約性德平等理趣。故  
名爲事也。

⑥二誠

汝等當共一心被精進鎧發堅固意

一心誠勿亂。精進誠勿懈。堅固誠勿退也。良以如  
來實智久成。權迹長遠。化窮三世。益徧十方。非等  
覺已下所能思議故也。亦是寄彌勒以誠大會。

⑦三許

法華會義十二  
二十  
如來今欲顯發宣示諸佛智慧。諸佛自在神通之力。諸佛師子奮迅之力。諸佛威猛大勢之力。諸佛智慧總標果智也。自在是我德。神通是樂德。奮迅除垢是淨德。大勢威猛是常德。此點圓滿四德。徧能三世益物。故皆名力。約過去久遠久遠。名爲自在神通。約現在分身徧滿十方。名爲師子奮迅。約未來益物永永不窮。名爲大勢威猛。或可奮迅。是將前之狀表未來益物。大勢是震動十方。卽現在益物。亦無不可。又自在神通是究竟慈悲室。

師子奮迅是究竟法空座威猛大勢是究竟忍辱衣。證此究竟三德。故力徧十方三世。爲益不窮也。  
初長文竟

⑤二偈頌二。初頌誠。二頌許。略不顯述歎。⑥今

初

爾時世尊欲重宣此義而說偈言

當精進一心我欲說此事勿得有疑悔

⑦二頌許

佛智叵思議汝今出信力住於忍善中昔所未聞法

今皆當得聞。我今安慰汝。勿得懷疑懼。佛無不實語。智慧不可量。所得第一法甚深叵分別。如是今當說汝等一心聽。

初誠許竟

①二正說三。初從此訖壽量品是正開近顯遠。二分別功德品初長文是總授法身記。三彌勒說偈是總申領解。②初中三。初訖此品是略開。顯動執生疑。二壽量品是廣開顯斷疑生信。③初又二。初略開。二疑請。④初又二。初長文。

二偈頌

①初又二。初答所師。二答來處。不答

何因緣集所以下文重請

②今初

爾時世尊說此偈已。告彌勒菩薩。我今於此大衆宣告汝等。阿逸多。是諸大菩薩摩訶薩無量無數阿僧祇從地涌出。汝等昔所未見者。我於是娑婆世界得阿耨多羅三藐三菩提已。教化示導是諸菩薩調伏其心。令發道意。

此先答誰爲其說法教化而成就。從誰初發心之問也。

法華會義十二  
二十一  
⑤二答來處又二。初答二釋。

⑥今初

此諸菩薩皆於是娑婆世界之下。此界虛空中住於諸經典讀誦通利思惟分別。正憶念。

界下空中。略如前釋。此答其住處卽是來處也。於諸經典等者。追答稱揚何佛法受持行誼經修習。何佛道之間也。於諸經典者。圓人受法。無法不圓。法華妙典。一切十方三世經典悉入其中。權實不二。終不取一捨一。此答稱揚也。讀誦通利思惟分別。是答受持。正憶念是答修習。

⑤二釋又二。初釋住處。二釋稱揚受持修習。

⑥今初

今初

阿逸多。是諸善男子等。不樂在衆多有所說。常樂靜處。勤行精進。未曾休息。亦不依止人天而住。

不樂在衆者。界內界外五陰名之爲衆。二邊分別名爲多。有所說。靜處者。中道第一義諦也。法界一相。絕待無餘。故名靜處。勤行精進。未曾休息者。心流注任運。與薩婆若相應也。不依人天者。人表有邊。天表空表。不依二邊。故以此界虛空表之。正

住常寂光法性土也

①二釋稱揚受持修習

常樂深智無有障礙亦常樂於諸佛之法一心精進求無上慧

由其常樂深智無有障礙所以於諸經典悉皆稱揚由其常樂諸佛之法所以讀誦通利思惟分別由其一心精進求無上慧所以能正憶念也初長文竟

②二偈頌二初頌長文二正略開顯

初頌答所師二頌答來處

爾時世尊欲重宣此義而說偈言

阿逸汝當知是諸大菩薩從無數劫來修習佛智慧悉是我所化令發大道心此等是我子

長文但云得菩提已化令發心不云無數劫來或謂止是圓頓利根一生超證此中但云無數劫來是我所化不云在成道後或謂止是行因行時化令發心故爲但答所師未曾彰灼開顯

③二頌答來處

依止是世界常行頭陀事。志樂於靜處捨大衆憤鬧。不樂多所說。如是諸子等學習我道法晝夜常精進。爲求佛道故。在娑婆世界下方空中住。志念力堅固。常勤求智慧。說種種妙法。其心無所畏。  
初頌長文竟

⑤ 二正略開顯

我於伽耶城菩提樹下坐。得成最正覺。轉無上法輪。爾乃教化之。令初發道心。今皆任不退。悉當得成佛。我今說實語。汝等一心信。我從久遠來。教化是等衆。

既云成道之後。令初發心。又云從久遠來。教化是等。乃是略開近而顯遠。所以動執生疑也。初略開竟。

⑥ 二疑請二。初長文。二偈頌。⑦ 初中二。初經家

敘疑。二勝疑請答。

⑧ 今初

⑨ 三菩薩

爾時彌勒菩薩摩訶薩及無數諸菩薩等。心生疑惑。怪未曾有。而作是念。云何世尊於少時間。教化如是無量無邊阿僧祇諸大菩薩。令任阿耨多羅三藐三菩提。

法華會義十二  
二五  
⑤二騰疑請答二。初騰疑。二請答。⑥初中三。初

法說。二立譬。三法合。⑦初又三。初執近疑遠

二執遠疑近。三結難信。⑧今初

卽白佛言。世尊。如來爲太子時。出於釋宮。去伽耶城  
不遠。坐於道場。得成阿耨多羅三藐三菩提。從是已  
來。始過四十餘年。世尊云何於此少時。大作佛事。以  
佛勢力。以佛功德教化。如是無量。大菩薩衆當成阿  
耨多羅三藐三菩提。

⑨二執遠疑近

世尊。此大菩薩衆。假使有人。於千萬億劫。數不能盡  
不得其邊。斯等久遠已來。於無量無邊諸佛所植諸  
善根。成就菩薩道。常修梵行。

⑩三結難信

世尊。如此之事。世所難信。

初法說竟

⑪二立譬

譬如有人。色美髮黑。年二十五。指百歲人。言是我子。  
此譬上執近而疑遠也。色美髮黑。總是明年少耳。

法華會義十二  
其百歲人亦指年少。言是我父生育我等

此譬上執遠而疑近也  
是事難信

此譬結難信也

子三法合

佛亦如是得道已來。其實未久

此合年二十五。不應有百歲子也

而此大衆諸菩薩等。已於無量千萬億劫爲佛道故  
勤行精進。善入出住。無量百千萬億三昧。得大神通

久修梵行。善能次第習諸善法。巧於問答。人中之寶  
一切世間甚爲希有

此合百歲之人。不應是年二十五者所生也

今日世尊方云得佛道時。初令發心。教化示導。今向  
阿耨多羅三藐三菩提。世尊得佛未久。乃能作此大  
功德事

此合結難信也。初騰疑竟

癸二請答又二。初明請意。二正請答。子初又二。

初爲現在。二爲未來。丑今初

我等雖復信佛隨宜所說佛所出言未曾虛妄佛所知者皆悉通達

我等雖未了知仰信而已

⑤二為未來

然諸新發意菩薩於佛滅後若聞是語或不信受而起破法罪業因緣

淺行易生誹謗墮惡道不退者雖復仰信以未

了知不能增道損生故須答釋令謗者生信信者

增道損生也初明請意竟

⑥二正請答

唯然世尊願為解說除我等疑及未來世諸善男子聞此事已亦不生疑

一請除現在疑二請除未來疑也初長文竟

⑦二偈頌二初頌騰疑二頌請答

頌法說二頌立譬三頌法合 ⑧初又三初頌

執近二頌執遠三頌結難信 ⑨今初

爾時彌勒菩薩欲重宣此義而說偈言

佛昔從釋種出家近伽耶坐於菩提樹爾來尚未久

法華會義十一  
三十九  
子二頌執遠

此諸佛子等其數不可量久已行佛道住於神通力  
善學菩薩道不染世間法如蓮華在水從地而涌出  
皆起恭敬心住於世尊前

子三頌結難信

是事難思議云何而可信佛得道甚近所成就甚多  
願爲除衆疑如實分別說

初頌法說竟

癸二頌立譬

譬如少壯人年始二十五示人百歲子髮白而而皺  
是等我所生子亦說是父父少而子老舉世所不信  
初五句頌譬執近疑遠次一句頌譬執遠疑近後  
二句頌譬結難信也

癸三頌法合

世尊亦如是得道來甚近是諸菩薩等志固無怯弱  
從無量劫來而行菩薩道巧於難問答其心無所畏  
忍辱心決定端正有威德十方佛所讚善能分別說  
不樂在人衆常好在禪定爲求佛道故於下空中住

初半偈。頌合年二十五。次三偈半。頌合百歲子。略不頌合結難信也。初頌騰疑竟。

⑤二頌請答

我等從佛聞於此事無疑。願佛爲未來演說令開解。若有於此經生疑不信者。卽當墮惡道。願今爲解說。是無量菩薩。云何於少時教化令發心。而住不退地。初略開顯動執生疑竟。

釋從地涌出品竟。次釋壽量品。

如來壽量品第十六

如來者十方三世諸佛。二佛三佛本佛迹佛之通號也。壽者受也。量者詮量也。詮量十方三世二佛三佛本佛迹佛之功德也。今正詮量本地三佛功德。故言如來壽量品。如來義甚多。今且明二身三身餘例可解。二身者。真身如來。應身如來也。如成論云。乘如實道。來成正覺。故名如來。卽二身義顯。何者。乘是如智。實是如境。道是因。覺是果。若單論乘。則如無所知。若單明實。則如無能知。境智和合。則有因果。照境未窮名因。盡源爲果。因圓果滿。卽

法華傳義十二  
是乘如實道來成正覺。此真身如來也。以如實智  
乘如實道來生三有。示成正覺。卽應身如來也。報  
冥法名爲真身。從體起用名三身者。法身如來。報  
爲應身。但云二身。攝法周足。身如來。化身如來也。如大論云。如法相解。如法相  
說。故名如來。卽三身義足。何者。如卽法如。如境界非  
因非果。有佛無佛。性相常然。徧一切處。而無有異。  
故名爲如。不動而至。名之爲來。此約所證卽法身  
如來也。又復如智稱於如理。從理名如。從智名來。  
故曰如法相解。此約能證。卽報身如來也。又以如

如境智合故。卽能處處示成正覺。轉正法輪。故曰  
如法相說。此約起用。卽化身如來也。偈云。水銀和  
真金。能塗諸色像。功德和法身。處處應現往。如明  
月之影徧萬川。故名爲應。亦名爲化。此之三身不  
可單取。故大經云。法身亦非涅槃。般若亦非涅槃。  
解脫亦非涅槃。三法具足。稱秘密藏。名大涅槃。當  
知三身不可一異。縱橫並別。圓覽三法。稱假名如  
來也。文云。非如非異者。非彼偏如。以顯圓如。卽法  
身如來義。又云。如來如實知見三界之相。卽如如

法華會義十二  
三十一  
智稱如如境以一切種智知以佛眼見是報身如  
來義又云或示已身已事或示他身他事卽應身  
如來義若但性德三如來者是橫若但修德三如  
來者是縱若先法次報後應亦是縱今經圓說不  
縱不橫三如來也縱橫三身尚非今義況三藏通  
教所明如來耶又法華前亦明圓三身義同是迹  
中三身耳發迹顯本三如來者永異諸經故天親  
論云示現成大菩提無上故示三種菩提一應化  
菩提隨所應現卽爲示現如經出釋氏宮故二報

佛菩提十地滿足得常涅槃如經我實成佛已來  
無量無邊劫故三法佛菩提謂如來藏性淨涅槃  
不變如經如來如實知見三界之相故經具其義  
論出其名不如上釋寧會經論耶又三身各論單  
復單義如前法身複者一自性清淨法身二離垢  
妙極法身報身複者一自受用報二他受用報應  
身複者一勝應二劣應又一應現佛界身二應現  
九界身若束此單復三身而爲二身則二種法身  
及自受用報名爲真身他受用報及勝劣應等名

法華會義十二  
三十一  
爲應身。故知若複若單。若三若二。平等平等。更欲廣說。則四身十身三十二身無量身等。開合自在。多不爲多。少不爲少。非少非多。而少而多。倘執名相。而欲妄較諸經優劣。遠之遠矣。次明壽量者。真如不隔諸法。故名爲受。此法身壽也。境智相應。故名爲受。此報身壽也。一期示現。連持不斷。故名爲受。此應身壽也。詮量法身如來。如理壽命。詮量報身如來。智慧壽命。詮量應身如來。同緣壽命。故言壽量。法身如來。如理壽命者。有佛無佛。性相常然。

不論相應。不論連持。非無量。非有量。故文云。非如非異。非實非虛。蓋詮量法身。如理命也。報身如來。智慧壽命者。以如如智契。如如境。境發智爲報智。冥境爲受。境既無量。無邊常住。不滅。智亦如是。譬如函大。蓋大。故文云。我智力如是。久修業所得。慧光照無量壽命。無數劫。此詮報身智慧命也。應身如來。同緣壽命者。緣長則長。緣促則促。如水清月現。月實不來。水濁月亡。月亦不去。故文云。數數現生。數數現滅。或復自說名字不同。年紀大小。此詮

法華會義  
應身同緣命也。當知所詮不出四句。一者有量。二者無量。三者亦有量亦無量。四者非有量非無量。有量則無常無量則常。雙亦則亦常亦無常。雙非則非常非無常。今以四句更作別圓二釋。一別教各釋者。非常非無常。雙非理極。卽法身也。常卽報身。報智冥法亦非常非無常。但取金剛道後。正智圓滿。不復生滅。故名爲常。又依唯識。則法身不生不滅。故名爲常。報身生因所生。故非常。圓滿成就。故非無常。卽雙非句也。亦常亦無常。卽是應身。應

用無盡。故亦常。數數唱滅。故亦無常也。無常卽是金剛心。前智用增進。乃至凡夫生滅出沒。皆是無常也。三佛各一句。凡夫共一句。故是別義。二圓教通釋者。三身各備四句。法身四句者。不生不滅。故名爲常。無彼凡夫妄計。倒常。故名無常。寂而雙照。故名亦常。亦無常。雙破凡聖。八倒。故名非常。非無常也。報身四句者。出過二乘。故名爲常。無妄計。常故名無常。智能雙照。故名亦常。亦無常。智冥諦境。故名非常。非無常也。應身四句者。應用不絕。故名

法華會義 十一  
三十四  
爲常。示同生滅。故名無常。兩義雙具。故名亦常。亦無常。既非實報。亦非業感。故名非常。非無常也。乃至凡夫。亦具三種四句。心性隨緣不變。故名爲常。所謂自從無始。至盡未來。輪迴生死。而生實不生。死實不死。此是性具法身常也。卽此心性不變隨緣流轉。五道生滅不停。名爲無常。此是法身無常義也。隨緣不變。故亦常。不變隨緣。故亦無常。此是法身雙亦義也。雖不變而非凝然。雖隨緣而非斷滅。此是法身雙非義也。約性具法身。既得作此四

句。依法身而起。惑感卽般若。卽是性具報身。亦作四句。依惑苦而起。業業卽解脫。卽是性具應身。亦作四句。是爲凡夫。理卽三身。各各四句。尚無四句名字。何況行用。圓人稱理而解。故有名字三身四句。觀行三身四句。乃至果成。則爲究竟三身四句。從始至終。一身卽三身。三身卽一身。不一不異。亦不縱橫。當知一佛身。卽具諸身。壽命功德。隨緣感見。長短不同。大經云。凡夫二乘。見佛壽命。猶如冬日。菩薩所見。猶如春日。唯佛見佛。壽命無量。猶如

法華會義十二  
三五  
夏日所以然者。凡夫博地翳障朦朧。藏通二乘雖斷四任。不見中道。若捨分段。受法性身。未破無明。方便土中所見之佛。猶是勝應。當知二乘。祇見冬日。若諸菩薩。未登別地。圓任所見。同彼凡夫。二乘若破無明。乃至受于分證法身。與而言之。得見報身壽命。奪而言之。他受用報。猶名勝應。未窮報身之源。未盡法性之極。所見佛壽。猶是春日。唯佛與佛。窮性盡源。見法身壽。猶如夏日也。故舉三譬譬之。一者於諸常中。虛空第一。一切壽命。如來第一。

此譬法身壽命無始無終。性相凝湛也。二者譬如四河皆歸大海。此譬報身壽命。所修萬善。皆感佛報。歸壽命海也。三者阿耨達池。出四大河。此譬應身壽命。從法報出。隨緣長短也。此品詮量。通明三身。若從別意。正在報身。何以故。義便文會。義便者。報身智慧。上冥下契。三身宛足。文會者。我成佛來。甚大久遠。故能三世利益衆生。所成卽法身。能成卽報身。法報合。故能益物。以此推之。正意是論報身佛功德也。如是三身種種功德。悉是過去久遠

法華會義十一  
久遠劫前道場樹下先所成就名之爲本。中間今日寂滅道場所成就者名之爲迹。非本無以垂迹。非迹無以顯本。本迹雖殊。不思議一也。若諸經所說本迹。則以寂場所成法報爲本。從本所起勝劣。兩應爲迹。今以寂場所成三身。乃至無量劫來中間所成三身。皆名爲迹。獨取最初實得菩提所成三身名之爲本。故與諸經異也。

②二廣開顯斷疑生信爲二。初誠信。二正答。

庚

初中四。初三誠。二三請。三重請。四重誠。其爲四

請四誠。并前迹門三請一誠。合有五誠七請。竒特大事。殷勤鄭重也。

③今初三誠

爾時佛告諸菩薩及一切大衆。諸善男子。汝等當信解。如來誠諦之語。復告大衆。汝等當信解。如來誠諦之語。又復告諸大衆。汝等當信解。如來誠諦之語。誠是忠誠。諦是審實。不欺於物。言則請真。昔由機淺。止可隨他意語。故方便施權說三說近。未告誠實。今是隨自意語。故言誠諦也。

④二三請

法華會義十二  
三十  
是時菩薩大衆彌勒爲首合掌白佛言世尊惟願說  
之我等當信受佛語如是三白已

菩薩旣秉誠誠不敢致疑說必信受也

辛三重請

復言惟願說之我等當信受佛語

辛四重誠

爾時世尊知諸菩薩三請不止而告之言汝等諦聽  
初誠信竟

庚二正答二初長文二偈頌 辛初中二初正開

近顯遠二明三世益物 壬初又二初出執近

之情二破近顯遠 癸今初

如來秘密神通之力一切世間天人及阿修羅皆謂  
今釋迦牟尼佛出釋氏宮去伽耶城不遠坐於道場  
得阿耨多羅三藐三菩提

此文三意初云如來秘密神通之力是出所迷之  
法二云一切世間天人及阿修羅是出能迷之衆  
三云皆謂今釋迦等是出其迷遠之情謂也秘密  
者一身卽三身名爲秘三身卽一身名爲密又昔

法華會集卷第十一  
三十一  
所不說名爲秘。唯佛自知名爲密。神通之力者三身之用也。神是天然不動之理。卽法性身。通是無壅不思議慧。卽果報身。力是幹用自在。卽應化身也。佛於三世等有三身。實得三身。其來甚久。於諸教中。秘而不說。故一切世間天人阿修羅皆謂今佛始於道樹得此三身。乃執近以疑遠也。此本說中。不復言及二乘。二乘開已皆名菩薩。故但對菩薩。菩薩攝在天人修羅三善道內。餘三惡趣罪重根鈍少智。并不知作此情謂也。菩薩有三種。下方

他方舊任。下方卽本日所化。故無執近之謂。他方舊任俱有二種。一從法身應生者。往世先得無生。或先已聞發迹顯本。設往世未曾得聞。往世報盡。受法性身。於法身地。自應得聞長遠之說。是故應生菩薩多無執近之謂。二者今生始得無生法。忍及未得者。咸有此謂也。

○二破近顯遠。上文誠諦之誠。正爲此也。復爲二。初正顯遠。二舉譬格量久遠。

○今初

然善男子。我實成佛已來。無量無邊百千萬億那由

他劫

成佛久遠則伽耶近謂卽破

⑤二舉譬格量久遠又三。初舉譬問。二答。三合顯

久遠

⑥今初

譬如五百千萬億那由他阿僧祇三千大千世界。假使有人。抹爲微塵。過於東方五百千萬億那由他阿僧祇國。乃下一塵。如是東行。盡是微塵。諸善男子。於意云何。是諸世界。可得思惟校計。知其數不。

直爾下塵之界尚不可說。况下塵不下塵界豈可

說耶

⑦二答

彌勒菩薩等俱白佛言。世尊。是諸世界。無量無邊。非算數所知。亦非心力所及。一切聲聞辟支佛。以無漏智不能思惟。知其限數。我等任阿惟越致地。於是事中亦所不達。世尊。如是世界。無量無邊。

一非算數心力所及。二非無漏智所思惟。三非阿惟越致所達。蓋惟佛智之所知耳。故佛功德。如十方大地土。十地功德。如閻浮地土。非虛語也。

法華會義卷十二  
四十一  
⑤三合顯久遠

爾時佛告大菩薩衆諸善男子。今當分明宣語汝等。是諸世界若著微塵及不著者盡以爲塵。一塵一劫。我成佛已來復過於此百千萬億那由他阿僧祇劫。下塵不下塵界已不可說。况復爲塵耶。况復過於此耶。僧傳云。羅什舊經無一塵一劫四字。有齊高僧曇副誦經感夢云。少一句。後果得之。金光明經云。一切海水可知滴數。無有能知如來之壽。此亦明未來常住。非明過去久成也。若引證此殊不

相應。又有約法身解此者。則有二迷。一法身無始。豈論遠劫。二法身平等。何獨釋迦先成。故知不達經宗。求深反淺問。一切諸佛悉顯本不。若有顯有不顯。則不得云諸佛道同。亦不得云是我方便。諸佛亦然。若同皆顯本。則諸佛皆云成佛甚久遠耶。答。顯本可同。遠近不等。例如日月燈明八子。大通智勝有十六子。釋迦一子。有子是同。數不必等。又凡成佛。則所證三身必同。故云諸佛道同。三世益物必同。故云是我方便。諸佛亦然耳。况本高迹下。

法華會義十二  
四十一  
本下迹高。本迹俱高。本迹俱下。凡有四句。一期開顯。何必盡同。惟原始要終。則諸佛所證之體同。三身所起之用同。亘三世。故不可說有異也。初正開近顯遠竟。

⑤二明三世益物。此以最初成道爲體爲本。從體起用爲迹。又以最初實得體用爲本。從是以來所有三世體用皆爲迹也。文分爲二。初法說。二譬說。⑥初中二。初正明三世益物。二總結不虛。⑦初又三。初明過去益物。二明現在益物。

三明未來益物。⑧初又三。初過去益物處。二拂過去迹疑。三明過去益物所宜。⑨今初

自從是來。我常在此娑婆世界說法教化。亦於餘處百千萬億那由他阿僧祇國。導利衆生。

須顯處者。上明成道甚久。久居何處。故云常在此界。及於餘國說法利生也。此之娑婆。卽本應身所居之土。今日迹居。不移於本。但今昔時異。見燒者。謂近照本者。達遠。故云我淨土不毀。常在靈鷲山。豈離伽耶。別求常寂。非寂光外。別有娑婆。

法華會義十一  
疑三  
寅二拂過去迹疑

諸善男子。於是中間我說然燈佛等。又復言其入於涅槃。如是皆以方便分別。

疑曰。若成佛如此之久。云何經中說於然燈佛時方得授記。又旣成佛證常任身。云何儒童菩薩在然燈時得記。弘法壽終入滅。更生餘處。諸如此類。不一而足。今拂之曰。皆是方便分別。譬如幻師所現幻事。非實爾時方得授記。亦非業果分段生身。捨壽入滅。皆是從本所垂。諸化迹耳。

寅三明過去益物所宜。又二初感應。二施化。卯

今初

諸善男子。若有衆生來至我所。我以佛眼觀其信等諸根利鈍。隨所應度。

至我所者。卽是過去衆生漸頓兩機。冥扣法身也。佛眼觀者。卽是久已成佛。用佛眼鑑照。無有遺差。將欲起於劣勝兩應。而利益之。善機凡有二力。一感人天華報。及三乘權果。二感佛道實果。若以法眼觀知萬善。緣其輕重各得華報。及權果報。不能

注華會疏十一  
四十三  
究竟知其終得種智果報。若以佛眼圓照萬善。則能具知始末華果。此經一向明佛眼觀能知衆生所有萬善。究竟得佛種智果也。信等諸根。卽五根也。慧根是了因。信進念定四根。皆屬緣因。此二善根。各有利鈍。通攝頓漸機緣。頓機利鈍。卽圓別根機。漸機利鈍。卽通藏根機。又大乘根名利。小乘根名鈍。又小乘根名利人。大乘名鈍。又四教乃至人天諸根。各自論利鈍。十法界衆生所有善根利鈍。爲機。如來悉照。無有遺差。隨所應度。而現形聲。

饒益也

卯二施化又二。初明形聲兩益。二明得益歡喜。

辰今初

處處自說名字不同。年紀大小。亦復現言當入涅槃。又以種種方便說微妙法。

名字不同。年紀大小。卽非生現生。當入涅槃。卽非滅現滅。皆形益也。方便說法。卽聲益也。處處者。豎則微塵劫數。橫則十方刹海。一一劫中。皆徧十方。一一刹中。皆歷塵劫。無非如來垂迹之時處也。名

字不同者。或示勝應。或示劣應。或示佛身。或示菩薩聲聞等身。身既不同。故名字亦不同也。年紀大小者。既示有身。則有壽命。修短不等也。應以現生而得度者。既能處處非生現生。應以現滅而得度者。亦必處處非滅現滅。故云亦復現言。當入涅槃也。種種方便說微妙法者。或頓或漸。或顯或密。或定不定。或兼或但。或對或帶。或施或開。或廢或立。總是如來善巧方便。總令衆生究竟得成一切種智。故微妙也。

辰 二明得益歡喜  
能令衆生發歡喜心

由施形聲兩化。令得權實四益。但云歡喜舉一以攝三也。初明過去益物竟。

丑 二明現在益物。二初感應。二施化。寅 今初

諸善男子。如來見諸衆生。樂於小法。德薄垢重者。

如來見者。卽佛眼照也。諸衆生。樂小法者。所見之機也。貪愛二十五有。卽人天機。名樂小法。自求現滅。卽二乘機。名樂小法。樂於漸次。紆迴佛道。卽三

法華會義十二  
四十五  
教菩薩機。亦名爲樂小法。乃至樂近說者。亦名爲樂小法。緣了二善功用。微劣名爲德薄。見思塵沙無明三惑濃厚。名爲垢重。問。非生現生。備施頓漸。二化七方便等。可是樂小法者。圓頓赴機。是應樂大法者。云何通名爲樂小法耶。答。此有四義。一約往日。雖發大心。不能專精。多著弊欲。不得出世。故名弊欲。以爲小法。二約現在。如佛未出世。諸天人等。雖有大機。而心染世樂。或著邪見。故名爲樂小法。此二義與下譬中宛轉於地之意同也。三約修

行。雖不樂三界。愛見小法。而樂三乘。灰斷亦名小法。雖不樂三乘。近果而樂。歷別修行一乘。不能一心圓頓。普修。故名樂小。此三意約因門。明樂小法也。四約果門。樂聞近成之小。出釋氏宮。始得菩提。不樂欲聞長遠大久之道。故言樂小。此等小心。非始今日。若先樂大。佛卽不說始成。說始成者。皆爲樂小者耳。

寅 二施化二。初明現形。二明說法。

卯 今初

爲是人說我少出家。得阿耨多羅三藐三菩提。然我

法華會義十二  
四  
實成佛已來。久遠若斯。但以方便教化衆生。令入佛道。作如是說。

此明現在爲衆生故。非生現生。而生實非生也。前明頓漸兩機來感法身。今卽現勝劣兩應。劣應應漸機。勝應應頓機。此兩種應並有。生法二身示生之相。劣應二身生相者。正慧托胎。右脇出生。卽行七步。一手指天。一手指地。自言天上天下。唯吾獨尊。此生身生相也。坐吉祥草。三十四心斷結習盡。證得五分法身。卽法身生相也。勝應二身生相者。

乘旃檀宮。與諸菩薩處摩耶胎。常說大乘作大佛事。從右脇出。十方周行。各各七步。作師子吼。此生身生相也。寂滅道場。坐菩提座。金剛後心。斷無明盡。妙覺朗然。窮照法性。種智圓明。萬德普備。此法身生相也。出家者。劣應出分段家。勝應出二死家。得菩提者。劣應得生滅。四諦所發。無漏盡。無生智。名爲菩提。勝應照三諦一實之道。究竟一切種智。爲菩提也。勝劣二種生身生相。祇是一番托胎出生。但大小兩機所見不同。故須甄明。非有兩番托胎出生也。二種出家。二種成道。二種法身生相。亦無不然。故云雙垂兩相。二始同時。然

法華會義十二  
四十七  
我實成佛下明本實不生。彼天人阿修羅等今始見此二種生法二身謂言始生。其實不然。然我實成佛道甚大久遠。如上所說剎塵之譬尚復過之。今日現生非實生也。或疑既非實生。何故現生。釋曰。但爲方便教化德薄垢重衆生。令入佛道。所以作如是說。我少出家得菩提耳。餘大乘經但破劣應生法二身。生實非生。不破勝應生法二身。今云成佛甚久。正破勝應法身。非從寂場始生。故與餘經永異。

卯二明說法又二。初正明一代所說。二釋出巧說之由。辰今初

諸善男子。如來所演經典皆爲度脫衆生。或說已身。或說他身。或示已身。或示他身。或示已事。或示他事。諸所言說皆實不虛。

所演經典徧指一代五味八教也。皆爲度脫衆生。總釋頓漸顯密定與不定。無非應病與藥。令得度脫故也。或說已身等略舉一代教中所有種種差別。示現事也。說自己往昔因緣名說已身。說諸佛

法華會義十一  
菩薩及餘弟子種種因緣名說他身。現佛界像名  
示己身。現九界像名示他身。或現勝應名示己身。  
現劣應身名示他身。現佛界事名示己事。現九界  
事名示他事。或現種智名示己事。現小智斷名示  
他事。現大自在名示己事。現九惱等名示他事。諸  
所言說皆實不虛者。明其不同世間之寓言也。爲  
衆生故。一一示現。一一有因有果。一一有始有終。  
惟其所說己身他身。所示己身他身。己事他事。並  
無分毫虛言誑語。故能度脫一切衆生。譬如幻師。

于四衢道。幻作象馬牛羊種種諸物。象卽是象。馬  
卽是馬。更無一物而不酷肖。乃能令彼愚小歡悅。  
佛亦如是。以法性大幻三昧。徧于十方三世。幻作  
己身他身。己事他事。說示于人。令彼衆生咸得見  
聞。並無一事徒構空言。乃使衆生信受。而得度脫  
也。

⑤二釋出巧說之由。又二。初明由照權實理。故卽  
是說示之本。二明由稱漸頓機。故卽是說示之

緣

⑥今初

法華會義十二  
所以者何。如來如實知見三界之相。無有生死。若退若出。亦無在世及滅度者。非實非虛。非如非異。不如三界見於三界。如斯之事。如來明見。無有錯謬。夫現前一念真如法性。本無一法可得。而無法不具。無法不造。一切凡聖平等無差。然凡夫及二乘人。則滯于二死。不能自度自脫。因位諸大菩薩。則局於數量。不能橫徧豎窮。皆由于此真如法性。未能圓滿徹證。故也。惟有如來久遠劫來。圓滿徹證此真法性。故能以種智佛眼。如實知見分段變易。

二種三界之相當體。卽是真如實相。了知二種生死。卽非生死。無有若退而在世者。既無生死。可退則無生死。可出故。無有若出而滅度者。無有生死。若退若出。是十界實法皆空。亦無在世及滅度者。是十界假名皆空。生死涅槃等如昨夢。故非實。迷爲生死。悟證涅槃。緣起宛然。故非虛。無差別而十界差別。故非如。卽差別而一性融通。故非異。不同二種三界之人。或見三界爲有。或見三界爲空。故云不如三界見於三界也。如斯之事。卽結指上文。

所明真俗妙諦卽生死無有生死卽退無有退卽  
出無有出卽在世無在世者卽滅度無滅度者卽  
實非實卽虛非虛卽如非如卽異非異是謂卽俗  
而真之事。如來以如理智而明見之。無有錯謬。故  
能隨智說于隨自意語。開權顯實。開迹顯本也。無  
有生。死。而妄見生死。無有退。出。而妄見退。出。無在  
世。而妄見在世。無滅。度。而妄見滅。度。非實。而妄見  
實。非虛。而妄見虛。非如。而妄見如。非異。而妄見異。  
是謂卽真而俗之事。如來以如量智而明見之。無

有錯謬。故能隨情說于隨他意語。爲實施權。爲本  
垂迹也。

②二明由稱漸頓機。故卽是說示之緣。

以諸衆生有種種性。種種欲。種種行。種種憶想分別。  
故欲令生諸善根。以若干因緣譬喻。言辭種種說法。  
所作佛事。未曾暫廢。

種種者。頓漸利鈍。千差萬別也。性者。習欲所成。指  
過去根種也。欲者。樂欲。卽從種所發之現行也。行  
者。隨諸樂欲。所作善惡業行。乃至三乘一乘出世。

法華會義十二  
五十一  
行也。憶想分別者。隨所作行而生于解。卽相似智  
慧也。於種種性。宜用種種爲人悉檀。於種種欲。宜  
用種種世界悉檀。於種種行。宜用種種爲人對治  
二悉。於種種憶想分別。宜用種種第一義悉。何以  
故。隨其所得憶想之解。更爲說法。卽得明悟第一  
義故。乃至初地。欲樂修行第二地時。亦必憶想二  
地之境。卽是念想。若發二地真解。卽是念想觀除  
言語法滅。直至佛地方得究竟離于憶想。獲常寂  
照耳。故以若干因緣譬喻之辭。種種說法。令其生

諸善根。所作佛事。未曾暫廢也。權實善根有三五  
七九之不同。故名爲諸。究竟皆歸一切種智故名  
佛事。三輪不思議化。晝夜常演。令他得益。無有間  
歇。故云未曾暫廢。二明現在益物竟。

②三明明未來益物。二初正明非滅唱滅。以益未來  
二釋須唱滅意。①初又二。初明本實不滅。二

明方便唱滅。②今初

如是我成佛已來。甚大久遠。壽命無量阿僧祇劫。常  
住不滅。諸善男子。我本行菩薩道時。所成壽命。今猶

法華會義十二  
五十一  
未盡復倍上數

甚大久遠壽命無量阿僧祇劫。牒前過去事也。常住不滅。正明未來永永恒益物也。我本行下。舉因。况果以明常住。謂于本未成佛已前。初悟圓因而登圓住。分證常住法身之壽。已不可盡。倍於如上所說塵數。何况果壽而非常住。譬如太子時祿已不可盡。况登尊極。祿用寧可盡乎。當知法身壽命無始無終。報身壽命有始無終。應身壽命隨緣修短。示有始終。今正明報身修得壽命。故過去雖約

剎塵爲譬。仍是有始。未來直云常住不滅。則是無終也。然三身本非一異。鈍者但見應化。不知卽報卽法。所以妄計無常。利者卽于應化而悟法報。所以能知常住耳。

卯二明方便唱滅

然今非實滅度。而便唱言當取滅度。如來以是方便教化衆生。

現在衆生見佛聞法。或始見我身。聞我所說。卽皆信受。入如來慧。或先修習學小乘者。我今亦令得

法華會義十二  
五十三  
聞是經入於佛慧。既入佛慧。卽知如來常住不滅。不爲此人而唱滅也。其有悠悠結緣之衆。乃至五千退席之流。移置他方之類。現在未得種熟脫者。此等衆生緣在未來。故以唱滅方便而教化之。當知三身並有非滅唱滅之義。法身非滅唱滅者。如淨名云。法本不生。今則無滅。卽是法身非滅。又云。是寂滅義。卽是法身唱滅。何者。若已了達。不唱寂滅。爲未了者唱耳。又若言照寂。卽是唱滅。若言寂照。卽是唱生。夫法身者。雖非生非滅。而亦有生滅。

若迷心執著。卽煩惱生。而智慧滅。若解心無染。卽智慧生。而煩惱滅。惑生解。此是無常滅。若解生惑滅。卽是寂滅。此之生滅。悉約法性而辨。若無迷解。二緣則不唱。有此生滅也。報身非滅唱滅者。誰有智慧。誰有煩惱。而言智慧能破煩惱。此卽明闇不相除。是報身不滅義。衆生未了聞。此便謂卽佛而生憍恣。不復修道。故復唱言。道能滅惑。有煩惱時。則無智慧。有智慧時。則無煩惱。豈非智慧能滅煩惱耶。應身非滅唱滅者。應是法報之用。體旣無。

法華會義十一  
三四  
滅用豈有窮卽是應身不滅。但爲衆生若常見佛則生憍恣。故唱我於今夜當取滅度也。又法身常體不生不滅。報身了達無能生滅。應身相續不生不滅。是故三身並皆非滅。今爲方便教化衆生。應身唱滅事同三身皆唱滅也。初正明非滅唱滅以益未來竟。

④二釋須唱滅意亦二。初不滅有損。二唱滅有益。

④今初

所以者何。若佛久住於世。薄德之人。不種善根。貧窮

下賤。貪著五欲。入於憶想。妄見網中。若見如來常在。不滅。便起憍恣。而懷厭怠。不能生難遭之想。恭敬之心。

不種善根。則不生真中二善。是爲無益。思惑貪著五欲。見惑入於憶想。見思方生。而不斷無明。重沓而回。知則不斷。通別二惡。是爲有損。又起憍恣。卽增見惑。懷厭怠。卽增思惑。故有損。不生難遭想。卽不能生見諦解。不生恭敬心。卽不能生思惟道。故無益也。若見聞三佛不滅。悉有憍恣義。聞法身不

法華會疏十一  
三五  
滅便謂衆生如彌勒如一如無二如平等卽真由  
是生於橋心上慢一切煩惱本自不生今亦無滅  
何須修道卽便恣情放逸爲是唱言是寂滅義又  
聞一切衆生卽菩提相菩提相卽煩惱相明闇不  
相除顯出佛菩提便起慢恣不復修善懈怠放逸  
爲是唱言報身智慧能滅煩惱無明力大佛菩提  
智之所能滅應身不滅憍恣易解

卯二唱滅有益

是故如來以方便說比丘當知諸佛出世難可值遇

所以者何諸薄德人過無量百千萬億劫或有見佛  
或不見者以此事故我作是言諸比丘如來難可得  
見斯衆生等聞如是語必當生於難遭之想心懷戀  
慕渴仰於佛便種善根是故如來雖不實滅而言滅  
度

是故唱言雖法本不生今亦不滅要須滅惑方乃  
寂滅此法身難見義雖云智慧不滅煩惱然明時  
無闇汝今具足煩惱何能有慧當知智慧能滅障  
惑此報身難見義應身難見易解衆生聞是唱滅

便於三佛生難遭想戀慕渴仰惡滅善生是故三  
身雖不實滅而唱滅也初正明三世益物竟

子二總結不虛

又善男子諸佛如來法皆如是為度衆生皆實不虛  
既成佛已實得三身皆悉不生不滅為諸衆生盡  
未來時現生現滅實得三身亦實不虛現生現滅  
亦實不虛所以三世衆生各各得益亦不虛也若  
但論理而不論事但論性而不論修則同世間寓  
言何名不虛又設但論事而不達理但論修而不

悟性則同權小生滅境界何名不虛故皆實不虛  
者即是權實本迹無不誠諦故也初法說竟

妙法蓮華經台宗會義卷五之二



弟子

- |    |        |    |        |
|----|--------|----|--------|
| 李茂 | 栢喜助壹兩  | 陳  | 栢喜助壹兩  |
| 李承 | 謙喜助伍錢  | 鄭芝 | 蒞喜助壹兩  |
| 廖文 | 科喜助壹兩  | 車  | 通喜助壹兩  |
| 陳門 | 徐氏喜助伍錢 | 車門 | 陳氏喜助伍錢 |
| 鄭門 | 齊氏喜助伍錢 | 鄭門 | 徐氏喜助伍錢 |
| 車門 | 牛大壽助伍錢 | 齊門 | 鄭氏喜助伍錢 |
|    |        | 車門 | 張氏喜助伍錢 |

佛弟子車淨直募造



廿二

60 1 2 3 4 5 6 7 8 9 70 1 2 3 4 5 6 7 8 9 80 1 2 3 4 5 6 7 8 9